

Waraga ya Yühanna ma Tumma tanno Yasu Tafa'da tumma

Sorne ya tafiini Yühanna, i'i yungngo arigiri ma tanangnga tindhigi nja tafünügü kadu ma kaniisa ko'do na kadu kadalinggo eege kudumma ma tamma tanno eene ka Yasu Almasihi no. I'i arigiri a'da Almasihi ara tii'bi kadu na anu ka tumma tanno Masala no, ara ka anangnga talingnge a kadu tanno ütü ka tamma ka Masala no. I'i arigiri nawaraga co nakaniisa tanno iidümmü kafünü keera no ma tuu'bu eege ka nanggeedi a'da kütü ka tamma kafada ka fiini ma talaana tanno toroko no nja ungngo ma tam'baga (Tumma na Yasu 2—3). Yühanna ikiri eema yiini ka tijöögö ma Masala ka kööyö nja tanno amana tidhindhi iini (Tumma na Yasu 4). Yühanna iji 'buugu ma dhünggü ya agiididene, Almasihi ya a'duga sorne ka niisö ma Masala ya kudumma iini i'i yungngo ama tafa'da i'i. Tiji 'buugu no kaala angnga a'da Masala nja Almasihi eege kungngo kafa ka eema tiya ka 'büdhülü ya (Tumma na Yasu 4—5).

Yühanna iji 'buugu ma tahükümü tanno ara tö'dö ka kadu tanno anu ka Masala no, tiji 'buugu ma nahitimi ka iidümmü kafünü eera (Tumma na Yasu 6.1—8.5), tijöögö ma iidö ka iidümmü kafünü eera (Tumma na Yasu 8.6—11.19), nja tijöögö ma naadho ka iidümmü kafünü eera (Tumma na Yasu 16.1-21). Almasihi ara tii'bi tatoroko ara tümü kadu na anu ka timin'da

tanno iini in'dilī kungngo (Tumma na Yasu 17—20). Masala mara taga'da 'būdhülū ya, mara ka talinggo 'būdhülū ya issi ya, a kadu na ümmü i'i kada dhorro no kara taneene kada unggodho ta'billi. Taalo 'büidī ma iyye ma tadhügürü alla tin'di alla inde (Tumma na Yasu 21—22).

¹ Tumma na Yasu Almasihi ka öö'dö iini ndama Masala, aala a kasaga tanno oono minna ara talinggo adene areere. Magürünü tadhangga yoono a'da aco adirina a tasaga tiya oono Yühanna.

² A Yühanna tadiri eema yiini ka tadinö kide ya nye'd'de ma Masala nja tumma tanno Yasu Almasihi.

³ A'diila nja ömö'di tiya iiri tumma ma tane'bi no, a'diila nja kadu na toodo kide kamma kide, kanangnga tumma na kirinja kide no ka nanggeedi, kudumma uuru ka ndakete.

Töøjülü nakaniisa na iüdümmü kafünü eera no

⁴ A'a na Yühanna nunggu a'a tumma no co nakaniisa tanno iüdümmü kafünü eera no ka anya ma Asiya no.

A türü nja ta'diila tanno Masala a tananja aaga ndama Masala ndama tiya inggide ya nja tiya aganna kide ya nja tiya ara tö'dö ya, ndama nagoronggore tanno iüdümmü kafünü eera no kidha ma kööyö tiya iini,

⁵ ndama Yasu Almasihi ya adho ka fiini ya, ya adinö ka tumma ma Masala, ya afiki'dö ka inde ka dhidha ya, a tauugaara ma naguugaara ma

'būdhülü. I'i asaasa angnga oolona angnga ka tatoroko tanno aja ana eriidö tiya iini.

⁶ Anangnga angnga kada tauugaara nja ka'boge ma talinggo ada a Masala nja Pupa tiya iini, tidhindhî nja türü kungngo iini turi ta'billi. Amiin.

⁷ Aaga assa kini inni ungunu atö'dö ndama tülügü,
a kadu nye'd'de kara tiji i'i
nja kadu tanno üfü i'i no,
a kadu ka 'būdhülü nye'd'de tafara kudumma iini.
Kara tatimin'da. Amiin.

⁸ Masala Uugaara miki, “A'a na dhidha na ta eere, oogo ma 'bitingngö, maganeene, oogo mungngo mara tö'dö, mana türü ma eema nye'd'de.”

Tata tüm'bü ma tumma tanno Yasu

⁹ A'a na örre tiya ada Yühanna, angnga ta ungodho ka dhügürü nja tauugaara nja tidhi oona ku'bu naaja ka Yasu. Naganna a'a ka jasiira ma Batümüs kudumma tumma ma Masala nja tumma tanno Yasu.

¹⁰ İkirî Koronggore ka 'dingngö kede ka oona ka uuru ma Uugaara, ikirî a'a ka föönyö ömö'di kalneege ko'd'do afa fara ma tinüidö.

¹¹ İki, “Kiri eema yüüdü ka ijöögö ka sorne ya ku'bu nunggu co a nakaniisa tanno iidümmü kafünü eera no ka Afosus nja Samirna nja Pregamus nja Tiyatira nja Saardis nja Filadlifya nja Ladükiya.”

12 Nikiri a'a ka tassa keere ma tiiri omö'di ya eema nja a'a ya, nasala nakoyo ma nagalamba ma dahaba iidümmü kafünü eera.

13 Nasala a'a omö'di ka 'dingnge ka söödö ma nakoyo ma nagalamba afeene nja 'Bii'bala ma Tadü'd'dü, ten'di ma unngo iini ka oona ma dhonggoro malla maco uune, a jönnö ma dahaba mimi'didene kini ka orro.

14 Awu ma üüdü yiini a'bassa afa musa, afeene nja ndugaara, iye niini ta'dangnga'da afa issi.

15 Uune niini kalimaana afa tanyaanya na lukulukadene ka motoo'do no, tumma niini kafeene nja fara ma 'büdi tiya isö ku'bu dhabbu ya.

16 Ümmü midigi müdümümü mafünü eera ka nisö ma kuri nja kulu'ba ma dhonggoro mo, mana kuri ka na'dugugini atera meene micci akürö ndama miini ka ninö, alimaana ka dhugudha afa ndanaaya ma uuru ka teene.

17 Kede ka tasala i'i ya na'dinggö kini ka uune afa omö'di ya eyi ya, ikiri ka tümünü nisö ma kuri niini eede ka oona iki, "Fa tari'ba, a'a na dhidha na ta eere,

18 a'a nefe ka 'di ya naga eyi a'a nungngo nefe ka 'di ta'billi turi ta'billi, a'a nana türü nadagii'bi inde nangafata ma inde unngo eede nja 'buugu ma inde.

19 "Nggeege arigiri eema yüüdü ka ijöögö ya so, eema ya 'bitingngö nja tiya ara tö'dö keere afe'de ya.

20 A niimö ya küdhü ma midigi tammo iidümümü mafünü keera mo müüdü kijöögö kede

ka niisö ma kuri mo, nja nakoyo ma nagalamba ma dahaba nüüdü na iidümmü kafünü eera no, midigi tammo iidümmü mafünü keera mo eege ka kadhangga ma nakaniisa tanno iidümmü kafünü keera no, nja nakoyo ma nagalamba ma dahaba na iidümmü kafünü eera no eege ka nakaniisa tanno iidümmü kafünü keera no.”

2

Tumma ma co kaniisa ma Afosus

¹ “Arigiri ada tumma co tadhangga ma kaniisa ma Afosus,

Tumma no ö'dö ndama ömö'di tiya ümmü midigi miidümmü mafünü eera mo a niisö ma kuri, ungeene ka söödö ma nakoyo ma nagalamba ma dahaba ma iidümmü kafünü eera no.

² Nussu a'a linggo nüüdü a dhügürü tiya üüdü nja tidhi oona ku'bu tanno üüdü. Nussu a'a a'da taalo o'o nasaasa tumma na kadu tanno oroko no, nussu a'da nagiiiri o'o taneene ma kadu tanno iki a'da eege kada kadafiini a'da eege taalo kada kadafiini naduna eege kada korokoro.

³ O'o nidhi oona ku'bu nadagalinggo dhorro kudumma eere tiya eede nitaalo nagi'di.

⁴ Lakiini niimö yeede ka koroo'bo nja o'o miini ya, kudumma üüdü ka taadha ka tasaasa nüüdü na dhidha no.

⁵ Agiigi kiga yungngo üüdü ka 'dinggö ndama iini, naadha ka tatoroko napadaga ka linggo tanno üüdü ka dhidha no, üürü taalo o'o naadha ka tatoroko ya, ara a'a tö'dö küdü na'duga nakoyo ma lamba yüüdü ka 'buugu tiya oono.

⁶ Lakiini tumma no kanangnga a'a ka 'diila nja o'o kudumma üüdü ka anu ka tumma na naNikola afa meede ka anu kide kungngo.

⁷ Ömö'di ya ana iisine ya fa kini atoodo ka tumma tanno Koronggore ka teemaga co nakaniisa no. Ara a'a tanangnga ömö'di ya ii'baana kagu fa ma tefe ka 'di ya ka 'di ma singgi ma Masala ya.”

Tumma ma co kaniisa ma Samirna

⁸ “Arigiri ada tumma co tadhangga ma kaniisa ma Samirna,

Tumma no kö'dö ndama ömö'di tiya dhidha ya nja tiya eere ya, ömö'di ya aga eyi efe ka 'di afe'de.

⁹ Nussu a'a dhügürü yüüdü, nussu a'a a'da na'döngngönyö o'o, lakiini tumma dhorro nana o'o eema dhabbu, nussu a'a tumma ma midhi ma kadu tanno iki a'da eege ka Yahüüdü no, lakiini eege taalo ka Yahüüdü, lakiini eege ka la ma talaana kadu tanno Ebliisi.

¹⁰ Fa tari'ba a dhügürü tiya ara tö'dö küdü ya, ara Ebliisi tanangnga kadu könö ana kada ka pabuusu ma ta'b'ba aaga, aaga tüünü muuyu kide a füngngö ada'baaga. Aaga ümmü tumma neede dhorro salla aaga taaya, ara a'a tanangnga ndalebö ma tefe ka 'di aaga.

¹¹ Ömö'di ya ana iisine ya fa kini atoodo ka eema tiya Koronggore ka teemaga co a nakaniisa ya, ömö'di ya ii'baana ya taalo inde kara tili i'i ka oona teera ara.”

Tumma ma co kaniisa ma Pregamus

¹² “Arigiri ada tumma co tadhangga ma kaniisa ma Pregamus,

Tumma na ömö'di ya ana kulu'ba mo dhonggoro mana kuri ka na'dugugini a teera meene mo.

¹³ Nussu a'a a'da nanna o'o kiga, 'buugu ma kööyö tiya Ebliisi ya kiga. Nümmü o'o tumma ma a'a dhorro taalo o'o nanu ka tamma tanno eede, munda ka uuru tanno Antibas ömö'di ya amma kede ya, eema tumma neede dhorro ya, agiididene kada kannu ka 'buugu tiya Ebliisi ka tanna kide ya.

¹⁴ Lakiini nïimö inggide idhilli anangnga a'a ka koro'bo nja o'o, kudumma kadu könö kungngo üüdü kümmü talaana na Balam, ya kalaana Blak ma tanangnga kadu ma Israyil a'da ka'dinggö ka kodhi ma tatoroko kagu uu'da ma tirri ma namasala, küüni eema ma weerö ma temelö.

¹⁵ Afe'de kadu könö kungngo üüdü kümmü talaana na naNikola.

¹⁶ Nggeege aadha ka tatoroko, üürü nanu o'o ya, ara a'a tö'dö küdü kannu areere nö'dö teema koro'bo nja eene a kulu'ba tammo dhonggoro mo meede ka nïinö mo.

¹⁷ Ömö'di ya ana iisine ya fa kini atoodo ka tumma tanno Koronggore ka teemaga co nakaniisa no. Ömö'di ya ii'baana ya, ara a'a tanangnga alman ya kaküdhü ya, nanangnga misì ma 'bassa mo iini ma eere tiya issi ya, ka takirinja kide, taalo ömö'di ma tussu illi ömö'di ya ananja iini ya.”

Tumma ma co kaniisa ma Tiyatira

18 “Arigiri ada tumma co tadhangga ma kaniisa ma Tiyatira,

Tumma no kö'dö ndama 'Bii'bala ma Masala ya afinne ka iye afa issi ya, uune niini ka afeene nja tanyaanya tanno alukulukadene no.

19 Nussu a'a linggo nüüdü, nussu tasaasa nüüdü nja tamma nja linggo nja tidhi oona ku'bu, nussu a'a a'da nalinggo o'o dhabbu nadagii'bi linggo na dhidha no.

20 Lakiini a'a nagoroo'bo nja o'o kudumma üüdü ka toolomana aka mana eere a'da Isabeel mo ko'do, mümmü eyi yoono a'da oogo ma ne'bi, malaana kadu neede a'da küüni eema ma temelö kagu uu'da ma tirri eema ma namasala.

21 Nanangnga a'a naguuru oono a'da maadha ka tatoroko illi oogo manu ka taadha ka temelö tanno oono.

22 Yungngo eede kara tapügü oogo ka tenggere ma dhügürü, nadhifi kadu na füngngö ana oogo no kadhügürü, üürü kene ka titaalo kaadha kalinggo ma tatoroko tanno oono.

23 Ara a'a tagirina laala yoono afe'de, amang ka nakaniisa tussu a'da nawwa a'a nanggeedi nja nanggüüdü, ara a'a tamana eema aaga kada köje nja türü tanno üüdü.

24 A 'bitingngö niki aaga, aaga na türeene ka Tiyatira no, aaga no taalo kata'da ka talaana tanno oono, taalo kussu tumma neene ka tema a'da tumma na Ebliisi na küdhü no, ara a'a tiki aaga a'da, taalo a'a nara tadho aaga ka oona a niimö tiya indhi ya afe'de.

25 Lakiini aaga fa ka tiya kada ya, ara a'a ka

öö'dö.

²⁶ Ömö'di ya ii'baana ya, ütü ka tumma tanno eede turi ya, ara a'a tanangnga tauugaara iini ma kadu nye'd'de kungngo.

²⁷ 'Ara i'i tauugaara meene a kuufi ma ndaliili, a'böyö ana eege ku'bu afa nadhafala ma tam'bala kungngo,'

afa meede ka 'duga tauugaara ka Pupa tiya eede.

²⁸ Ara a'a tanangnga ndalfoore ma taka iini afe'de.

²⁹ Ömö'di ya ana iisine ya fa kini atoodo ka eema tiya Koronggore ka teemaga co a nakaniisa ya."

3

Tumma ma co kaniisa ma Saardis

¹ "Arigiri ada tumma co tadhangga ma kaniisa ma Saardis,

Tumma na ömö'di tiya ana nagoronggore ma Masala ka iidümmü kafünü eera nja midigi ma iidümmü mafünü eera ya, nussu a'a linggo nüüdü, o'o nefe ka 'di ana eere, lakiini neyi o'o.

² Adinö ko'do nafa ka 'bandefe ka 'di ya öreene ya ndakete kara teyi kudumma linggo tanno üüdü taalo kadho ka fiini kidha ma Masala tammo eede.

³ Agügi eema yüüdü ka takalaadene kide na taföönyö ya, amma kide, naadha ka tatoroko. Küdü ka titaalo nadinö ko'do ya, ara a'a tö'dö küdü afa tanyooro, taalo o'o nara tussu uuru neede kara tö'dö küdü iini no.

⁴ Lakiini liga kadu könö ungnö üüdü ka Saardis, taalo kanyoro ten'di yeene, kara tunggeene nja a'a ana en'di tiya ka'bassa ya ka oona, kudumma eene kama tümmöönö.

⁵ Ömö'di ya ara tii'baana ya ara tümmü ten'di ya ka'bassa ka oona afa meene, taalo a'a nara ta'duga eere yiini ka sorne ma tefe ka 'di, lakiini ara teema tumma niini kidha ma Pupa tiya eede nja kadhangga tanno iini.

⁶ Ömö'di ya ana iisine ya fa kini atoodo ka tumma na Koronggore ka teemaga co nakaniisa no.”

Tumma ma co kaniisa ma Filadlifya

⁷ “Arigiri ada tumma co tadhangga ma kaniisa ma Filadlifya,

Tumma ndama ömö'di tiya insili ada timin'da ya ana ngafata na Dawud kini kara tafa'da ñnye, taalo ömö'di ma teere kide, a kini kara teere kide ya, taalo ömö'di ma tafa'da.

⁸ Nussu a'a linggo nüüdü. Assa, a'a nungngo nafa'da ñnye o'o taalo ömö'di ara tambaanya teere kide. Nussu a'a a'da o'o a 'bantürü yüüdü ya dhilli ya, nümmü o'o tumma neede nafa kide, nitaalo na'düsünü eere yeede.

⁹ Ara a'a tanangnga kadu no ma la ma talaana ma Ebliisi na ümmü nanggeyi neene a'da eege ka Yahüüdü lakiini eege taalo ka Yahüüdü, a'da kakorokoro, ara a'a tanangnga eege ka tüürü küdü kidha ana küüge, amang kene tussu a'da a'a nasaasa o'o.

¹⁰ Kudumma üüdü ka tamma nidhi oona ku'bu ka tumma tanno eede, ara a'a tafa küdü ka uuru ma tatoroko tanno ara tö'dö, ma tara

tö'dö ta'b'ba kadu ka oona nye'd'de na anna ka 'büdhülü no.

¹¹ Ara a'a tö'dö areere, afa ka eema tiya üüdü 'bitingngö ya iï'di ömö'di öccö ta'duga ndalembö nüüdü.

¹² Ara a'a tanangnga ömö'di ya iï'baana ya kada miide ma la ma Masala tammo eede, taalo atö'dö kürö ndama iini. Ara a'a tarigiri eere kini ka oona ana eere ma Masala tammo eede nja eere ma anya tammo Masala tammo eede Örsaliim ma issi mo, mara tö'dö ku'bu ndama 'dotombo'do ndama Masala tammo eede. Nakiri eere yeede ya issi ya kini ka oona.

¹³ Ömö'di ya ana iisine ya fa kini atoodo ka tumma tanno Koronggore ka teemaga co nakaniisa no.”

Tumma ma co kaniisa ma Ladükiya

¹⁴ “Arigiri ada tumma no co tadhangga ma kaniisa ma Ladükiya,

Tumma na ömö'di tiya Amiin adho ka fiini adhorro nja timin'da, i'i ya üüdü ma eema tiya Masala ka tadina ya.

¹⁵ Nussu a'a linggo nüüdü, nussu a'a a'da taalo o'o niicolo alla nagu'daana, nasaasa a'a a'da o'o niicolo alla nagu'daana.

¹⁶ Kudumma üüdü ka tayuyu taalo niicolo nitaalo nagu'daana ara a'a tunggu o'o kürö ndama niinö tanno eede.

¹⁷ Niki o'o a'da, 'Nüüsü a'a nana eema dhabbu, taalo a'a nasaasa niimö,' lakiini taalo o'o nussu tumma üüdü ka tarodo ka en'di ka oona, nüüni muuyu, nüüni mananggööyö, eema

titaalo күдү, nakisinsoro, naneene ana oona ku'bu.

¹⁸ A'a tadirina tumma o'o a'da nana dahaba kede, ya lukuladene ana issi, amang күдү түүсү, afe'de nana en'di ya ka'bassa ya, nagirni күдү ka oona amang күдү takүdhü oona ma modolo nüüdү no. Nana miiiri ma iye namana күдү ka iye amang күдү tiji 'buugu.

¹⁹ Ara a'a talaana ömö'di yeede ka asaasa i'i ya nagirnaana kini. Nagu'daana ka eedi naadha ka tatoroko tanno üüdү.

²⁰ Na'dingnge a'a ka iye nadhoodho, ömö'di ya föönyö tumma neede afa'da iye ya, ara a'a co naguri nja iini, aguri nja a'a.

²¹ Ömö'di ya ara tii'baana ya, ara a'a tanangnga i'i ka temmi ka kööyö nja a'a, afa meede ka tii'baana nemmi nja Pupa tiya eede ka kööyö tiya iini.

²² Ömö'di ya ana iisine ya fa kini atoodo ka eema tiya Koronggore ka teemaga co nakaniisa no."

4

Kööyö na ka 'dotombo'do ya

¹ Nikiri a'a ka tasala iye ma 'dotombo'do ka tafa'da. Tumma ma ömö'di yeede ka aföönyö ka dhidha ya eema nja a'a a tumma kafeene nja tiniidö iki, "Sirigi ko'do kita na a'a tala o'o ka niimö tiya ara talinggo adene ka tiya keere ya."

² Amussu kungngo ya, a Koronggore ka 'dingngö kede ka oona, kede kidha kanna nasala kööyö ka 'dotombo'do ana ömö'di ka temmi kide.

3 Ömö'di ya emmi ya, afeene nja misi ma dhöyö mo nja niigisi tanno kirikiri mo nja tam'biili taku'du kööyö ko'do afeene nja samaret.

4 A nagöoyö kukumu kadu kafünü egiisö no (24), kaku'du kööyö ko'do, a kadiifi no kukumu kadu kafünü egiisö no, kemmi ka kööyö kümmü en'di kada ka'bassa, kalembö ma dhaba kunggo eene ka nanggüüdü.

5 A talimaana ma tombo'do ticci akürö ndama kööyö, a fara ma baana ma tombo'do. Kidha ma kööyö a nakoyo ma lamba ka iidümmü kafünü eera kafinne, nagoronggore ma Masala na ödö ka iidümmü kafünü eera no eege kamiini.

6 A kidha ma kööyö afeene nja to ma gasasa ka tinsili afa nduguri.

A ka söödö miini, taku'du ma kööyö eema tiya efe ka 'di ya egiisö ya, iye ungnö eene kadhabbu kidha nja eere.

7 Niimö ya adinö ya dhidha ya afeene nja tagaamu, aya asigi kide ya afeene nja kodha, a niimö ya adinö ya iidoona ya afeene ka dhugudha ma ömö'di, a niimö ya adinö ya egiisö ya afeene nja kolo tiya alagala ya.

8 Ndama eema tiya efe ka 'di ya egiisö ya nye'd'de, egedhe ungnö eene iidümmü kafünü ungnö, iye aku'du eege ka oona ndama teene nja kürö, taalo tüüsü meene ma rumeene osooso a naguuru,

“Tinsili, tinsili, tinsili,

Masala Uugaara ma ana türü mo,
ma 'billi nja 'bitingngö mara tö'dö.”

⁹ Eema ya egüisö ya efe ka 'di ya tüwe tüüsü ma tafünügü ko'do nja ta'diila nja tindhigi ko'do a ömö'di tiya emmi ka kööyö ya efe ka 'di turi ta'billi.

¹⁰ A kadüifi no kukumu kadu kafünü egüisö no, tüürü ka ömö'di tiya emmi ka kööyö ya kidha kamma ka ömö'di ya efe ka 'di ta'billi, kadhifi kalembö neene kidha ma kööyö kiki,

¹¹ “Ka Uugaara müidi nja Masala,
o'o nama tindhigi ko'do nja tamma nja türü,
kudumma üüdü ka talinggo eema nye'd'de
ndama eedi tiya üüdü eefe ka 'di.”

5

Sorne nja dhünggü

¹ Nikiri a'a ka tasala sorne ka nüisö ma kuri, tanno ömö'di ya emmi ka kööyö ya ikirinja ka teene miini nja 'dugeere miini, kabünnü nahitimi kide ana hitimi na üdümü kafünü eera no.

² Nasala tadhangga ana türü eema ko'd'do iki, “Mada i'i yungngo ama ta'buna nahitimi ku'bu afa'da sorne?”

³ Taalo ömö'di ka 'dotombo'do nja 'büdhülü nja 'büdhülü ka tüm'bü atambaanya tafa'da sorne assa ka nüimö tiya inggide ya.

⁴ Natafara 'do kudumma ömö'di ka titaalo adunadene ma tama tafa'da sorne iiri nüimö ya inggide ya assa kide.

⁵ İkiri tadüifi könö ka tiki a'a, “Fa tafara, assa tagaamu ma siliga ma Yahüüsa, a 'bereere a ma Dawud i'i akii'baana ana türü, a'bunaana

nahitimi na iidümmü kafünü eera no afa'da sorne.”

⁶ Nikirī a'a ka tassa ka dhünggü kafeene afa miini ka tendhe a'dingnge ka söödö ma kööyö nja eema tiya efe ka 'dī ya egüisö ya nja kadīifi. Nja dhünggü ya ana iidö ka iidümmü kafünü eera nja iye ka iidümmü kafünü eera no, eege ka nagoronggore na Masala na iidümmü kafünü eera no, kagürünüdene ka 'büdhülü ka oona nye'd'de.

⁷ İkirī dhünggü ka öö'dö a'duga sorne ka nīsö ma kuri tanno ömö'dī tiya emmi ka kööyö ya.

⁸ Kini ka 'duga sorne ya, İkirī eema ya egüisö ya efe ka 'dī ya nja kadīifi no kukumu kadu kafünü egüisö no ka tüürü ka dhünggü kidha a nagüüge, kisirin'di unngo eene ka iisine eege in'dili, a naadho ma dahaba kadigine a kondho, teema nja Masala na kadu tanno insili no eege kamiini.

⁹ Katagüüwe tüüsü ma issi mo kiki,
 “O'o nama ta'duga sorne
 nafa'da nahitimi miini
 kudumma üüdü ka takatendhe
 na o'o taana kadu a Masala ana eriidö tiya
 üüdü
 ndama kadu kasiliga nja tumma ka tam-
 bananjaana ku'bu nja kadu nja naanya
 'do.

¹⁰ Nanangnga eege kada tauugaara nja ka'boge
 na Masala,
 kada naguugaara ma 'büdhülü.”

5:5 5.5 Takwiin 49.9; Asaiya 11.1, 10 **5:6 5.6** Asaiya 53.7;
 Yühanna 1.29 **5:9 5.9** Tüüsü ma Nakaaru 33.3; Asaiya 42.9–10
5:10 5.10 Tö'dö kürö 19.6; Danial 7.22, 27

11 Nassa co afe'de naföonyö tumma ma kadhangga dhabbu. Kaku'du kööyö ka oona nja eema tiya efe ka 'di nja kadüifi. Eege na alif kafünü kide ana alif kada'baaga.

12 Kalneege ko'd'do kiki,
 “Dhünggü ya atendhe ya
 i'i yungngo ama ta'duga türü nja eema
 dhabbu nja ta'dara nja türü
 nja tindhigi ko'do nja tafünügü ko'do.”

13 Naföonyö a'a eema tiya ka 'dotombo'do ya nja tiya ka 'büdhülü nja tiya ka 'büdhülü ka tüm'bü ya nja tiya ka to ya nja 'buugu ka oona nye'd'de iki,

“Ömö'di tiya emmi ka kööyö ya nja dhünggü,
 kada kanangnga ta'diila a Masala
 nja tindhigi ko'do nja tafünügü ko'do nja
 türü turi ta'billi.”

14 Eema ya efe ka 'di ya egiisö ya tiki, “Amiin,” a kadüifi tüürü ku'bu a nagüüge kafara kini.

6

Tafa'da nahitimi na üdümmü kafünü eera no

1 Nasala a'a dhünggü ka tafa'da hitimi ya dhidha ya ana ka na üdümmü kafünü eera no, nikiri a'a ka föonyö nüimö tiya efe ka 'di tiya egiisö ya, alneege ko'd'do kafeene afa fara ma baana ma tomo'do, “Aayu!”

2 Nikiri a'a ka tassa co kanna nasala muttu a'bassa, ömö'di ya aka kide ya ana taprpara ka nüisö a ndalembö ma tii'baana ananja iini, öö'dö kürö ma tii'baana ii'baana.

³ Ka dhünggü ka tafa'da hitimi ya eera ya, naföonyö a nïimö tiya efe ka 'dï ya eera ya ka tiki, “Aayu!”

⁴ A muttu könö adhöyö ö'dö kürö. Ömö'dï ya aka kide ya, ananja türü iini ma tö'dö a'duga ta'diila ka 'büdhlü, amang ka kadu tagirina ajeene. Kanangnga kulu'ba ma dhonggoro mo iini.

⁵ Aga dhünggü ka ndafa'da hitimi ya iidoona ya, naföonyö a nïimö tiya efe ka 'dï ya iidoona ya ka tiki, “Aayu!” Nasala muttu ya 'dü'd'dü ya, ömö'dï ya aka kide ya, misaana unngo iini ka nïisö.

⁶ Naföonyö tumma ka söödö ma eema tiya efe ka 'dï ya egiisö ya, katiki, “Almiti ma dhokoro ana jine ama uuru ka ungodho, almiti ma mudeere ma iidoona ana jine ma uuru ka ungodho, lakiini fa taga'da uu'ba nja ngeeli.”

⁷ Ka dhünggü ka tafa'da hitimi ya egiisö ya, naföonyö a nïimö tiya efe ka 'dï ya egiisö ya ka tiki, “Aayu!”

⁸ Nïkirï a'a ka tassa co nasala muttu irrïfi kaseere, ömö'dï ya aka kide ya, ana eere a'da inde, nja 'buugu ma inde kuurna i'i keere kete, Türü kungngo eene ma 'dakeyi ma 'büdhlü ma tiidi eege a kulu'ba tammo dhonggoro mo, ana iire nja maara nja eema ma toroko ma 'büdhlü.

⁹ Aga dhünggü ka ndafa'da hitimi ya iidümmü no, nasala nagoronggore tanno kadu na aradene no ka üüdü ma tumma tanno Masala no nja tumma tanno eene ka tageema no ka misi ma tirri ka tüm'bü.

10 Kikiri katiidhe ko'd'do kiki, “Taagaada Uugaara ya Insili, ya tatimin'da ya, taalo o'o nara tummu kadu ma 'büdihülü na'diinö ada unngo ma eriidö tiya iidi?”

11 En'di ya ka'bassa ya, kananja kene ku'bu, iki eene a'da kagünü idhilli ara türeene ma köje nja kadu na alinggo no nja nagöre tanno eene no ara tagirinadene afa eege a'dimo.

12 Nikiri a'a ka tasala dhünggü ka tafa'da hitimi ya iidümmü afünü ungodho ya. A 'büdihülü tatinggi'di dhindho, a ndanaaya ta 'dü'd'dü kafeene nja taliisi ma fara, a tere tafeene nja eriidö nye'd'de kungngo,

13 a midigi ma 'dotombo'do ta'dinggö ka 'büdihülü afa iye ma indiiye na arume no ka 'dinggö ndama 'daafa a tanya ka tagi'di eege ka oona dhindho.

14 A 'dotombo'do tadam'budu ko'do afa sekede, a na'dikinya nja najaseera tooso ka na'buugu tanno eene nye'd'de kungngo.

15 A naguugaara ma 'büdihülü nja kadu niifi no nja kadu ma eema dhabbu nja naguugaara ma nasigira, a naguugaara nja kasaga in'dili kungngo nja tanno taalo ka kasaga no, nye'd'de karünö kaco kubumba nja naagara ma na'dikinya.

16 Kiki a na'dikinya nja naagara, “Aaga 'dinggö kidi ko'do aaga taküdhu unngo kudumma iye tanno ömö'di tiya emmi ka kööyö ya nja tagoroo'bo tanno dhünggü.

17 Kudumma uuru ma tagoroo'bo tanno eene na dhabbu no ka ndö'dö, a mada i'i yungngo ara tambaanya eege?”

7

Kadu ma Israyil nö'dö 144,000

¹ Nggeege afe'de nasala a'a kadhangga ka egüisö ka'dingnge ko'do ka na'dugugini ma 'büdhülü ada egüisö miini, kakara a tanya ma 'büdhülü na egüisö no, amang ka tanya tafa tiisö ka 'büdhülü nja to alla naafa.

² Nafada nasala tadhangga könö ö'dö ko'do ndama fiini ma ndanaaya, hitimi ya Masala tammo efe ka 'di mo unngo iini. Ümmünü kadhangga na egüisö no ko'd'do na ana türü ma taga'da 'büdhülü nja to no.

³ Iki eene, “Aaga fa taga'da 'büdhülü nja to nja naafa, ara unngo kabünnü hitimi ka kasaga tanno Masala tammo aja ka nadhugudha.”

⁴ Nikiri a'a ka aföönyö a'da kadu na kabünnü hitimi kene ka nadhugudha no kö'dö na alif a kadu ka iüdümmü a kadu keera kafünü egüisö (144,000) ndama siliga ma Israyil nye'd'de kungngo.

⁵ Na alif kada'baaga kafünü eera (12,000) ndama siliga tiya Yahüüsa
na alif kada'baaga kafünü eera (12,000) ndama siliga tiya Röbin
na alif kada'baaga kafünü eera (12,000) ndama siliga tiya Jad.

⁶ Na alif kada'baaga kafünü eera (12,000) ndama siliga tiya Ashiir
na alif kada'baaga kafünü eera (12,000) ndama siliga tiya Naftali
na alif kada'baaga kafünü eera (12,000) ndama siliga tiya Manasi.

⁷ Na alif kada'baaga kafünü eera (12,000) ndama
siliga tiya Shamön

na alif kada'baaga kafünü eera (12,000) ndama
siliga tiya Lawi

na alif kada'baaga kafünü eera (12,000) ndama
siliga tiya Yasakir.

⁸ Na alif kada'baaga kafünü eera (12,000) ndama
siliga tiya Zabaloon

na alif kada'baaga kafünü eera (12,000) ndama
siliga tiya Yüüsif

na alif kada'baaga kafünü eera (12,000) ndama
siliga tiya Binyamiin.

Kadu na dhabbu no

⁹ Nikiri a'a ka tasala kadu kadhabbu taalo
ömö'di ma tambaanya tinni eege ndama naanya
nja kadu 'do nja tumma ka tambananjaana
ku'bu, ka'dingnge ana kö'dö kidha ma kööyö nja
kidha ma dhünggü, kümmü en'di ya ka'bassa ya
ka oona, kümmü iisine ma naafa ma tamuru.

¹⁰ Kiidhe ko'd'do kiki,

“Toolona kungngo a Masala tammo aja

ma emmi ka kööyö mo

nja dhünggü afe'de.”

¹¹ A kadhangga nye'd'de takaku'du kööyö ko'do
nja kadifi nja eema tiya efe ka 'di ya egiisö ya.
Küürü ka kööyö kidha ana dhugudha kümmü
Masala,

¹² kiki a'da,

“Amiin, tafünügü ko'do nja tindhigi ko'do nja
tussu eema

nja tamana ta'diila nja tindhigi ko'do

nja türü nja tambaanya ka na Masala tammo aja
turi ta'billi.

Amiin.”

¹³ Ömö'di könö ana ka kadııfi iki a'a, “Kadu öjö
eege kungngo kümmü en'di ya 'bassa ya ka oona,
eege kö'dö ndama kiga?”

¹⁴ Nikiri a'a ka tiki iini, “Ömö'di eede, nussu
o'o.”

Iki a'a a'da, “Kadu no eege kungngo koolon-
adene ka dhügürü tiya dhiiri ya, eege kamiini,
kagunu en'di yeene ana eriidö ma dhünggü
anangnga eege kada ka'bassa.

¹⁵ Yungngo eene ka tanna kidha ma kööyö tanno
Masala
kalinggo ada oono uuru ana ooso kungngo
ka la tiya oono,
nja ömö'di tiya emmi ka kööyö ya
ara taküdhü eege ka oona ka fangga tammo
iini.

¹⁶ Taalo iire ara tagu eege,
a tenege ka tagu eege afe'de,
taalo ndanaaya ara tagu'du eege,
a tagu'daana taalo kara tala eege ka oona.

¹⁷ Kudumma dhünggü ya ka söödö ma kööyö ya
ara tadasaana afa kene
uurugu eege ka nduguli ma 'biiidi ma tefe ka
'di.

A Masala tayugu 'biiidi ma iieye eene ka iieye.”

7:14 7.14 Danial 12.1; Matta 24.21 **7:14 7.14** Asaiya 1.18

7:16 7.16 Asaiya 49.10 **7:17 7.17** Tüüsü ma Nakaaru 23.1-2;
Yühanna 6.35; Yühanna 7.37-38; Yühanna 10.11-14 **7:17 7.17**
Asaiya 25.8

8

Hitimi ya iidümmü afünü eera ya

¹ Ka dhünggü ka ndafa'da hitimi ya iidümmü afünü eera ya, a 'buugu tamudhudhuli ka 'dotombo'do a dhüdhü ma ndanaaya.

² Nasala kadhangga na iidümmü kafünü eera no ka'dingnge ana ko'do kidha ma Masala, iidö tananja eene ka iidümmü kafünü eera.

³ A tadhangga könö tö'dö ümmü dha ma kondho ma dahaba öö'dö a'dingnge ka misä ma tirri. A kondho tananja iini dhabbu ma tirri iini, amang kini tagusu ka fara ma kadu tanno Masala nye'd'de ka misä ma tirri ma dahaba kidha ma kööyö.

⁴ A ndhiigö ma kondho tisi a kürö ndama niisö ma tadhangga in'dili nja tafara ma kadu tanno Masala kaco oo'do kidha ma Masala.

⁵ İkirä tadhangga ka tümmü dha ma kondho adigi issi ma tirri kide, apügü i'i co 'büdihülü, tabaana ma tombo'do nja talimaana ma tombo'do nja tatinggi'di ma 'büdihülü.

Iidö na iidümmü afünü eera no

⁶ A kadhangga na iidümmü kafünü eera no kümmü iidö ya iidümmü kafünü eera no, kindinaana oona ku'bu ma tabbü eege.

⁷ A tadhangga ya dhidha ya tabbü tinüidö niini, ikirä olle tö'dö nja issi atonggoonyo ana eriidö, öö'dö uurunja ka 'büdihülü. A 'dakeyi ma 'büdihülü tatinyogo, a 'dakeyi ma naafa tatinyogo nja ooyo tiya agiiri ya nye'd'de.

⁸ A tadhangga ya eera ya tabbü tinüidö niini, a niimö adhabbu afa 'dikinya afinne nye'd'de

apügünja co to a 'dakeyi ma to tatem'bele kada eriidö.

⁹ A 'dakeyi ma eema ya efe ka 'di ya anna ka to ya taaya, a 'dakeyi ma namürkabü tatangga'da.

¹⁰ A tadhangga ya iidoona ya tabbü tiniidö niini, a timidigi kadhabbu ka a'dinggö ndama 'dotombo'do ka finne afa issi ka'dinggö ka 'dakeyi ma neeri nja nakanduguli ma 'biidi.

¹¹ Eere ma timidigi a'da Tamaara. A 'dakeyi ma 'biidi ta'bele a'diiri, a kadu na kooye no taaya kadhabbu kudumma iini ka'diiri.

¹² A tadhangga ya egüisö ya tabbü tiniidö niini, a 'dakeyi ma ndanaaya tabbü adene, nja 'dakeyi ma tere nja 'dakeyi ma midigi, idhi a türeene ma töyeene neene talüllü, a türeene ma töyeene ma uuru nja ooso titaalo.

¹³ Nassa co nasala kolo ka alagala ka söödö ma 'dotombo'do, eema ko'd'do, "Am'ba, am'ba, am'ba ka kadu ma 'büdhülü kudumma türeene ma fara ma iidö na kadhangga tanno iidoona no kara tabaana."

9

¹ A tadhangga ya iidümmü ya, tabbü tiniidö niini, nasala timidigi ka 'dinggö ka 'büdhülü ndama 'dotombo'do, anangnga ngafata ma ööye tiya adhonggoro ya iini. A tadhangga ya iidümmü ya, tabbü tiniidö niini, nasala timidigi ka 'dinggö ka 'büdhülü ndama 'dotombo'do, anangnga ngafata ma ööye tiya adhonggoro ya iini.

² A timidigi tafa'da ööye tiya dhonggoro ya, a ndhiigö tisi kürö ndama iini afa ndhiigö ma tambürüü'di na dhabbu no, a ndanaaya nja 'dotombo'do tandüüli nja 'buugu 'do kudumma ndhiigö ma ööye.

³ A müdüüni tö'dö kürö ndama ndhiigö kaküdhü 'büdhlülü, a'duga türü afa türü ma na'baja ma 'büdhlülü kungngo.

⁴ Kiki iini a'da afa taga'da ooyo ma 'büdhlülü alla ooyo ya kirikiri ya nja naafa, illi kadu na taalo kana hitimi ma Masala ka nadhugudha tanno eene.

⁵ Taalo kananja türü eene ma tiidi eege, lakiini apusu eege a nagatereene kiidümmü, tapusu niini kafeene nja tüföönö ma 'baja.

⁶ Ara kadu tasaasa inde ka naguuru tanno miini no taalo kara taluna, kasaasa taaya, inde tüsö eene ku'bu.

⁷ A müdüüni tafeene nja naguttu no kindinaana oona ku'bu ma koro'bo no, eema unngo eene ka nanggüüdü afeene nja kalembö ma dahaba, dhugudha yeene afeene nja dhugudha ma ömö'di.

⁸ Awu yeene afeene afa awu ma iiya, igini neene kafeene nja kiselle ma agaamu.

⁹ A naaro neene tafeene nja mudugusi ma ndaliili, a fara ma egedhe tiya eene kafeene afa uune ma karru ma naguttu kadhabbu kiisö ka koro'bo.

¹⁰ Nakatiidi miini kaföönö afa nakatiidi ma na'baja, türü kungngo iini ma tili kadu ka oona a nagatereene kiidümmü.

11 Uugaara unngo eene i'i ya tadhangga ma ööye ya dhonggoro ya, ana eere a tangga Ebriya yiini a'da Abbdün, a tangga Yünan a'da Abulion.

12 Tagoroo'bo na dhidha no kanco, a tagoroo'bo öccö keera kara tö'dö afe'de.

13 A tadhangga ya iidümmü afünü ungodho ya tabbü tiniidö, naföonyö fara köö'dö kürö ndama iidö tanno egüisö no ka misi ma tirri ma dahaba mo ka Masala kidha mo.

14 A tumma tiki a tadhangga tiya iidümmü afünü ungodho ya ümmü tiniidö ya, "Apa ka kadhangga tanno egüisö no na imi'dinja ka ri ma Fürat ya dhabbu ya."

15 A kadhangga tanno egüisö no kindinaana oona ku'bu nja ndanaaya nja uuru nja tere nja ürününü, amang kene tagirina türeene ma kadu.

16 Naföonyö a'a a'da nasigira ma naguttu kö'dö na alif kadhabbu.

17 Nasala naguttu nja kadu tanno aka kide no a kümböödö kana namudugusi kafeene nja issi adhöyö öödhe, a 'dü'd'dü, a kirikiri kafeene afa kebrüit. A nanggüüdü ma naguttu kafeene nja nanggüüdü ma agaamu, issi ticci kürö ndama eene ka niinö nja ndhiigö nja kebrüit.

18 A türeene ma kadu tagirinadene a tagoroo'bo tanno iidoona no, issi nja ndhiigö nja kebrüit ya icci a kürö ndama niinö ma naguttu no.

19 Türü ma naguttu ka kaneene ka niinö nja nakatiidi tanno eene, kudumma nakatiidi tanno eene kafeene nja nöönü a nanggüüdü kagi'di kadu iini.

²⁰ A türeene ma kadu tanno oolonadene ka tagoroo'bo no kitaalo kaadha ka tatoroko tanno eene ka tagalinggo ana iisine tanno eene no, kamma ka nagana'bu ana eema ma namasala ya ma dahaba ya nja fudda nja tanyaanya nja miši nja ndagee'di ma eema namasala taalo kara tambaanya tiji 'buugu kitaalo kaföonyö eema kitaalo kunggeene.

²¹ Kitaalo kaadha ka tagirina kadu nja tageene nja temelö nja nyooro.

10

Tadhangga nja sorne ya idhilli ya

¹ Nikiri a'a ka tasala tadhangga könö ana türü ungunu ku'bu ndama 'dotombo'do. Aküdhü oona a tülüügü, a tam'biili kungngo iini ka üüdü, dhugudha yiini afeene nja ndanaaya, uune niini tafeene nja nagiide ma issi.

² Sorne ya idhilli ya ma ungnö iini ka niisö, ma tanfa'da. Anangnga awwa ma niisö ma kuri yiini ka to, anangnga awwa ma niisö ma küüle yiini ka 'büdhülü.

³ Adhiya a tumma ko'd'do afa fara ma tagaamu. Kini ka ndakiidhe ya, a baana ma tom'bo'do na iidümmü kafünü eera no talneege a fara tiya eene.

⁴ Kene ka ndageema ya, a'da nakindinaana a'a oona ku'bu ma tarigiri, nikiri ka föönyö tumma ndama 'dotombo'do iki a'a, "Nafa takiri eege ku'bu bünnü hitimi kide afa tabaana ma tombo'do na iidümmü afünü eera no ka takiki."

⁵ İkirî tadhangga yeede ka tasala i'i ka 'dingnge ana ko'do ka to nja 'büdhlü ya, alaga nîsö ma kuri niini co 'dotombo'do.

⁶ Aküdüönö ana eere ma ömö'di tiya efe ka 'di ta'billi ya, marü'bü 'dotombo'do ana eema tiya inggide ya nye'd'de, nja 'büdhlü ana eema tiya inggide ya, nja to ana eema tiya inggide ya nye'd'de, iki, “Taalo tadoono ku'bu afe'de.

⁷ Lakiini ka naguuru tanno tadhangga tiya iidümmü afünü eera ya ka tabbü tinüüdö niini ya, ikirî tumma na Masala na küdhü no ka ndatüümö afa ma nagane'bi na alinggo ada oono no ka tageema i'i kunggo.”

⁸ A tumma neede ka taföönyö ndama 'dotombo'do no, eema nja a'a afe'de iki, “Kolo na'duga sorne ya tanfa'da ya ka nîsö ma tadhangga ya 'dingnge ana ko'do ka to nja 'büdhlü ya.”

⁹ Nikirî a'a kaco ka tadhangga niki iini anangnga sorne ya idhilli ya a'a. İki a'a, “Duga naguri ara tanangnga eedi yüüdü ka 'diiri, i'digi'di afa küde üdü ka nînö.”

¹⁰ Nikirî a'a ka 'duga sorne ya idhilli ya ka tadhangga ka nîsö natöümü i'i. A'digi'di afa küde kede ka nînö, lakiini kede ka tatamü a'diiri kede ka eedi.

¹¹ A tumma tiki a'a, “Eema a tumma tiya tö'dö no afe'de co a kadu 'do nja nagonggo'do nja naguugaara.”

11

Kadu na adinö kide na eera no

¹ Kanangnga tam'bala a'a kafeene nja kuufi iki a'a, "Fiki'dö ninni la ma Masala nja misì ma tirri, ninni kadu na afara ka Masala kide no.

² Lakiini 'dadillö na kürö ma la ma Masala no, fa kene nafa tinni eege kudumma eene kananja a kadu tanno taalo ka Yahüüdü no, kara tisiraana ka anya tammo insili mo a nagatereene kukummu kadu keera kafünü eera (42).

³ Ara a'a tanangnga türü a kadu tanno adini kide no keera ndama a'a, en'di ma nataliisi ungnö eene ka oona, kara teema tumma na Masala a füngngö alif miyateene sitiin (1,260)."

⁴ Kadu na eera no eege ka naafa ma 'dikidiyö nja nakoyo ma lamba tanno eera no, a'dingnge ana ko'do kidha ma Uugaara ma 'büdhülü no.

⁵ Ka ömö'di töccö kara tasaasa tilì eege ka oona ya, issi tö'dö kürö ndama eene ka naniinö kagirina nadiidi neene, nggeege ömö'di ya asaasa tilì eege ka oona ya ara tiididene.

⁶ Türü kungngo eene ma teere ka 'dotombo'do a tombo'do taalo kara tede ka naguuru tanno eene kara teema kide no, a türü kungngo eene ma ta'bele 'biidi kada eriido kabbü 'büdhülü a maara kadhoonyo kene ka asaasa.

⁷ 'Bitingngö kene ka ndatiimö tumma neene ya, a niimö ma toroko ya ö'dö kürö ndama ööye tiya dhonggoro ya ara tako'do kene ii'bi eege agirina eege.

⁸ Oofo yeene tapügünja ka nafiini ma anya tammo dhabbu mo, ana eere ma taköje a'da Sadöma nja Misiri, kita Uugaara tiya eene ka tabünnü ka salii'bi ya.

⁹ A kadu ndama naanya nye'd'de nja kadu 'do nja tumma ka tambananjaana ku'bu tadinö ka oofu tiya eene a füngngö iidoona a dhüdhü miini, taalo kara tafa ka ömö'di töccö a'da atü'bü eege.

¹⁰ Kadu ma 'büdihülü kara tadhodho küünü taanyara ma inde tanno kadu tanno eera no, kamana eema eene kudumma nagane'bi tanno eera no köö'dö a dhügürü a kadu ka 'büdihülü.

¹¹ Ka naguuru tanno iidoona a dhüdhü miini no ka ndafaradene ya, a koronggore ma tefe ka 'di tö'dö ndama Masala öö'dö kene ka oona, kafiki'dö ka'dingnge ko'do, ari'ba tümümü kadu na adinö kene no.

¹² Kaföönyö tumma kalneege ko'd'do ö'dö ndama 'dotombo'do iki eene, "Aaga sirö ko'do kita." Kikiri ka sirö co 'dotombo'do ka tülüügü, nadiidi meene tadinö kene.

¹³ Ka uuru tanno miini no a 'büdihülü tatinggi'di dhindho, a 'dakeyi ma anya ada'baaga türüdü. A kadu taaya na alif ka iidümmü kafünü eera (7,000) kudumma ma tatinggi'di ma 'büdihülü, ari'ba tümümü türeene ma kadu kafünügü Masala ma 'dotombo'do ko'do.

¹⁴ A tagoroo'bo na eera no co, a tagoroo'bo na iidoona no ara tö'dö kete kungno.

Tiniidö ya iidümmü kafünü eera

¹⁵ A tadhanga ya iidümmü afünü eera ya tabbü tiniidö niini, a tumma talneege ko'd'do ndama 'dotombo'do kiki,
 "Tauugaara ma 'büdihülü kanda tauugaara tiya
 Uugaara tiya aja nja Almasihi tiya iini,

i'i ara tauugaara turi ta'billi.”

¹⁶ A kadiifi no kukumu kadu kafünü egüisö no, temmi ka nagööyö tanno eene ka Masala kidha no, küürü ku'bu ana dhugudha kümmü Masala.

¹⁷ Kiki,

“Kanangnga ungngo ta'diila o'o, Masala Uugaara mana türü,
ma 'bitingngö mo, maganeene ma 'billi,
kudumma üüdü ka a'duga türü nüüdü na tauugaara.

¹⁸ Kadu ma kajeene kagoroo'bo,
kudumma uuru ma tagoroo'bo tanno üüdü ka ndö'dö
nja uuru ma tapusu kadu na aaya no.

Uuru ka ndö'dö ma üüdü kara tanangnga talingnge a kadu tanno üüdü nagane'bi,
nja kadu na insili no nja kadu tanno ari'ba eere tiya üüdü no,
na dhiidhi no nja tanno iifi no,
nagirina kadu na ka'da 'büdihülü no.”

¹⁹ A la ma Masala tatanfa'da ka 'dotombo'do, sandü ma timi'di tumma noono tabbü 'dala ka la ma Masala. A tombo'do talimaana, kabaana, a 'büdihülü tatinggi'di ajeene, a köröörö ta'dinggeene.

12

Aka nja ni ma 'büdi

¹ A niimö tabbü 'dala ka 'dotombo'do keefe, aka magirni ndanaaya oono ka oona, a tere kono ka uune ka teene, a kalembö ma midigi

tammo ada'baaga mafünü eera no, a ndalembö mungngo oono ka üüdü.

² Magüröönö mafara kudumma tin'di ma teene.

³ A näämöö künöö tabbü 'dala ka 'dotombo'do keefe nja nää ma 'bii'di ya dhabbu ya öödhe afa issi, nanggüüdü kungngo iini ka iidümmü kafünü eera ana iidö kada'baaga, nja ndalembö ka iidümmü kafünü eera.

⁴ Öösi 'dakeyi ma midigi ma 'dotombo'do ana tiidi tiya iini üpü co 'bühülü, ikiri nää ma 'bii'di ka 'dingnge ka aka kidha miini ka asaasa ta'duuru 'bii'bala kono kara teene.

⁵ Mikiri ka tageene 'bii'bala ya miide ya, i'i yungngo ara tauugaara ma 'bühülü nye'd'de kungngo a kuufi ma ndaliili, lakiini 'bii'bala yoono atonggoso aco ka Masala nja kööyö tiya iini.

⁶ Aka marünö maco a dhüile kita Masala ka takindinaana kono ku'bu, ma Masala kara tafa kono mamana eema oono a füngngö ö'dö alif miyateene sitiin 1,260.

⁷ A koro'bo tafiki'dö ka 'dotombo'do, Mikayiil nja kadhangga tanno iini nja nää ma 'bii'di tageema koro'bo nja kadhangga tanno iini.

⁸ Lakiini eege taalo kana türü, a 'buugu yeene ta'dugadene ka 'dotombo'do.

⁹ A nää ma 'bii'di ya dhabbu ya apügü i'i co 'bühülü, nää ya ma 'billi ya ana eere a'da Ebliisi nja Sitan ya iisiinü kadu nye'd'de, a'dinggö ku'bu i'i nja kadhangga tanno iini.

¹⁰ Nikiri ka aföönyö tumma ka alneege ka 'dotombo'do ko'd'do kiki,

“Bitiingngö katiiimö toolona, a Masala tammo aja
a türü nja tauugaara ma Masala tiya aja,
nja tauugaara tanno Almasiihi tiya oono.

Kudumma ömö'di üüfünü eema ka nagöre tanno
aja ka oona kidha ma Masala ya osooso a
naguuru,
kapügü i'i caa'bu.

¹¹ Eege kagii'bi i'i ana eriidö ma dhünggü nja
tumma tanno eene ka tageema no,

kapügü nanggeyi neene co meene kasaasa inde.

¹² Nggeege 'dotombo'do saga tadhodho nja kadu
tanno anna inggide no,

lakiini am'ba ka 'büdihülü nja to
kudumma Ebliisi a'bardaga ku'bu öö'dö
kada.

I'i adiginigo a tagoroo'bo kudumma iini ka tussu
a'da uuru niini ka öreene idhilli.”

¹³ Kini ka tassa kini ka 'dinggö ka 'büdihülü
ya, ikiri ka talinggo aka ma keene 'bii'bala kada
miide mo.

¹⁴ İkiri egedhe ma kolo tiya dhabbu ya eera
ya kananja aka, moonno ka taagala iini ku'b'ba
ndama ni ma 'biidi ma co 'buugu tiya oono
ka dhüle, kafa kono a nagürüünü kiidoona a
dhüdihü miini.

¹⁵ A ni ta'binyaga 'biidi kürö ndama niinö
tanno iini kafeene afa ri amang kini ta'duga oogo
ungeene iini.

¹⁶ Lakiini 'büdihülü oolona ka aka afa'da niinö
niini a'duuru ri ya ni ka tuuru ka co kürö ndama
niinö tanno iini ya.

17 İkirı nı ka koro'o'bo ka aka, ungeene aco teema koro'o'bo nja kadaada moonoo, ya aföönyö tumma ma Masala na ümmü tumma ma Yasu no.

18 A nı ma 'büidi ta'dingnge ana ko'do ka ndamugu ma to.

13

Niimö ma toroko ö'dö kürö ndama to

1 Nasala a'a niimö ma toroko ka tunggunu akürö ndama to nanggüüdü kungngo iini ka iidümmü kafünü eera ana iidö kada'baaga, iidö nye'd'de kana kalembö, nanggüüdü na miini no nagereene ma teela Masala kinggide.

2 A niimö ma toroko yeede kadasala ya afeene nja ünggü, uune niini kafeene nja uune ma 'böö, afeene ka niinö afa niinö ma tagaamu, İkirı nı ka anangnga türü niini iini nja kööyö tanno iini nja tauugaara nye'd'de.

3 Üüdü ma niimö ma toroko ungodho afa ma tana niimö ya in'di ya akete ka teyi illi niimö ya in'di ya aleme, a kadu ma 'büdhülü tadhere nye'd'de kungngo kuurna niimö ma toroko keere.

4 A kadu tüürü ka nı tiya dhabbu ya kidha kamma kini kudumma iini ka anangnga türü niini a niimö ma toroko küürü ka niimö ma toroko afe'de kamma kini kiki a'da, "Mada i'i yungngo afeene nja niimö ma toroko ma tambaanya koro'o'bo nja iini?"

5 Mada anangnga niinö a niimö ma toroko eema İndhigı oona coo'do eela Masala, a'duga türü miini ka talinggo a nagatereene kukumu kadu keera kafünü eera.

⁶ İkirî ka tafa'da niinö niini eela Masala, eela eere yoono nja 'buugu ma taneene tanno oono nja kadu tanno anna ka 'dotombo'do no.

⁷ A'duga türü ma teema koro'bo nja kadu tanno Masala ii'bi eege, a 'duga türü ma tauugaara ma naanya nye'd'de nja kadu 'do nja tumma ka tambanjaana ku'bu nja kadu.

⁸ Amang ka kadu ma 'büdhlü tamma kini nye'd'de kungngo, kadu na nagereene tanno eene ka titaalo kakirinja ka sorne ma tefe ka 'di sorne ma dhünggü tiya atendhe ya jiddi ma 'büdhlü ka tagarü'bü adene.

⁹ Ömö'di ya ana iisine ya fa kini atoodo kide.

¹⁰ Üürü ömö'di ya ara co ka tatasaga ya,

i'i ara co ka tadasaga,

üürü ömö'di kara tiididene a kulu'ba

ara tiididene a kulu'ba.

Tumma no kasaasa tidhi oona ku'bu ma kadu tanno insili no nja tamma.

Niimö ma toroko anna kürö ka 'büdhlü

¹¹ Nikirî a'a ka tasala niimö ma toroko öccö ka tunggunu ko'do ndama 'büdhlü ana iidö keera kafeene nja iidö ma dhünggü, eema afa ni ma 'biidi ya dhabbu ya.

¹² I'i alinggo a türü tanno niimö ma toroko tiya dhidha in'dili ana i'i kide kungngo. Anangnga 'büdhlü nja kadu tanno anna kide katamma ka niimö ma toroko tiya dhidha ya 'dokotere tammo iini ma inde ma kaleme mo.

¹³ Adagüünî eema keefe a dhabbu unggugu issi ka 'büdhlü ndama 'dotombo'do ka kadu kidha.

¹⁴ İisîni kadu ma 'büdihülü alinggo tanno iini ma tamma kini, niini ka 'duga türü adagalinggo kidha ma niimö ma toroko ya dhidha ya. A'bunu kadu ma 'büdihülü karü'bü koronggore ma niimö ma toroko ya abbü adene a kulu'ba ya assa ka aleefe tefe ka 'dî.

¹⁵ A'duga türü ma tafülle a'duga koronggore ka niimö ma toroko ya dhidha ya ka oona, amang kini teema, agirina kadu na anu katüürü ku'bu ka koronggore ma niimö ma toroko no nye'd'de kungngo.

¹⁶ Anangnga kadu nye'd'de afe'de na dhiidhi no nja tanno iifi no, nja tanno ana eema dhabbu no, nja tanno eema kitaalo kene no, nja kasaga, nja tanno taalo ka kasaga no, kanangnga kala eene ka niisö ma kuri üürü kene ka nadhugudha.

¹⁷ Taalo ömö'dî ma tambanya tana niimö üürü anadene a niimö illi ömö'dî ya ana kala ana eere ma niimö ma toroko üürü tamana ma eere tiya iini.

¹⁸ Ara tana eere ma ta'dara, ömö'dî ya ussu eema ya fa kini inni nagereene ma niimö ma toroko kudumma iini kada tamana ma ömö'dî ya ö'dö namiya ka iidümmü kafünü unggodho a kadu kiidoona ka iidümmü kafünü unggodho (666).

14

Dhünggü nja kadu tanno iini

¹ Nikirî ka tassa co nasala dhünggü ka 'dingnge ka 'dikinya ma Sahyüün nja kadu kungngo iini kö'dö miya arba arbayiin alif

(144,000), eere yiini nja eere tiya Pupa tiya iini ikirinja kene ka nadhugudha.

² Naföonyö tumma ndama 'dotombo'do kafeene nja fara ma 'bīdī tiya dhabbu ya afeene nja fara ma toombo'do tanno abaana dhindho no, afeene nja fara ma erempeera a kadu miini kabaana.

³ Kūūwe tüüsü ma issi mo ka kööyö ma Masala kidha ma eema tiya efe ka 'dī ya egīsō ya kidha ma kadiifi, taalo ömō'dī ma tambaanya talaanadene ka tüüsü tammo illi no ka kadu na öö'dō miya arba arbayiin alif (144,000) na oolonadene ka 'būdhülü no.

⁴ Kadu no eege kungngo taalo kanyoro nanggeyi neene nja iiya, kudumma eene kadaafa ka nanggeyi tanno eene katinsili. Kadu na miini no eege kungngo ko'd'do ka dhünggü keere kita iini kara co ya, eege kungngo koolonadene ka türeene ma kadu, kummü nanggeyi neene a Masala nja dhünggü kafeene nja eema tiya ö'deene ka dhidha ya.

⁵ Taalo naniinö neene keema korokoro, eege ka insili ka nanggeedi.

Kadhangga na iidoona no

⁶ Nikirī a'a ka tasala tadhangga könö ka lagala ka söödö ma 'dotombo'do, tumma ma injīli ta'billi co ka kadu ma 'būdhülü nja kadu ma naanya nja kadu ma tumma kadhoonyo nja kadu in'dīli.

⁷ Iidhe ko'd'do iki, “Aaga ri'ba a Masala aaga tafünügü oogo ko'do kudumma uuru ma tahükümü kadu no ndö'dö, aaga üürü ku'bu

aaga tamma ka ömö'di tiya arü'bü 'dotombo'do nja 'büdhülü ya nja to nja nakanduguli ma 'büdi."

⁸ A tadhangga könö tuurna i'i keere iidhe iki, "Ma'dinggö, ma'dinggö Babil ma dhabbu mo, kudumma oono manangnga kadu ma tooye ngeeli na itoto no ma temelö tanno oono."

⁹ İkirı tadhangga ya iidoona ya ka tuurna eege keere eema ko'd'do iki, "Ömö'di ya üürü amma ka nıimö ma toroko nja koronggore tiya iini amma ka kala tammo iini kini ka dhugudha üürü kini ka nıisö ya,

¹⁰ i'i afe'de ara tooye ngeeli ma tagoroo'bo na Masala na uurunja ka ker'de ma tagoroo'bo tanno oono, ara tapusu adene ana issı nja albaarü kidha ma kadhangga tanno insili no nja dhünggü.

¹¹ A ndhiigö ma tapusu tisi coo'do turi ta'billi a talıngnge titaalo uuru nja ooso ka kadu tanno üürü kamma ka nıimö ma toroko nja koronggore tiya iini no a nakömö'di tiya ana kala ma eere tiya iini ya.

¹² Ya asaasa tidhi oona ku'bu ma kadu tanno insili no kaföönyö tumma na Masala no, kütü katamma ka Yasu."

¹³ Naföönyö a'a tumma ndama 'dotombo'do kiki, "Arigiri tumma no, a'da a'diila nja kadu tanno ake ka linggo tanno Uugaara ndama uuru tanno."

Koronggore iki, "İi amang kene talıngnge ka dhügürü tiya eene kudumma linggo tanno eene ka tunggeene nja eene."

Tawaana migile koono ma 'büdhülü

14 Nikiri a'a ka tasala co nasala tülügü ka ta'bassa, ömö'di ya emmi ka tülügü ya, afeene nja 'bii'bala ma tadü'd'dü ndalembö ma tauugaara kungngo iini ka üüdü ma dahaba a manjala ma ungngo iini ka niisö mana kuri.

15 A tadhangga könö tö'dö kürö ndama la ma Masala iidhe a tumma ko'd'do ka ömö'di tiya emmi ka tülügü ya, "Duga manjala müüdü nara migile kudumma uuru ka ndö'dö a migile ma 'büd'hülü kanda ö'deene ma taraana."

16 Ömö'di ya emmi ka tülügü ya tapügü manjala miini co 'büd'hülü a migile ma 'büd'hülü taradene.

17 A tadhangga könö tö'dö kürö ndama la ma Masala ka 'dotombo'do, manjala mungngo iini mana kuri.

18 A tadhangga könö ya afa ka issi ya tö'dö kürö ndama misi ma tirri iidhe eema ko'd'do ka tadhangga tiya ana manjala ya ana kuri ya, "Duga manjala müüdü naruma ki'bim'bi ma 'büd'hülü kudumma iye miini ka ndö'döone."

19 A tadhangga tapügü manjala miini ka 'büd'hülü a taruma ki'bim'bi ma 'büd'hülü uuru ka 'doonya ma tiyaana ma tagoroo'bo tanno Masala na dhabbu no.

20 Kasiraana ka ki'bim'bi ka misi kürö ma anya, eriidö tisi akürö ndama 'doonya ma tiyaana iisö faaya idhi ala kili ma muttu akete kala nameele namiya keera (200).

15

Kadhangga na üdümü kafünü eera no nja namaara ka üdümü kafünü eera

¹ Nikiri a'a ka tasala niimö keefe ka 'dotombo'do adhabbu ka'diila, kadhangga ka iidümmü kafünü eera kümme namaara no iidümmü kafünü eera no, eege kungngo keere a Masala ka tatiimö tagoroo'bo noono iini.

² Nasala a'a 'buugu kafeene nja to tammo insili afa gasasa mo katonggoonyo ana issi, nasala kadu no kii'bi niimö ma toroko nja korong-gore tiya iini ana tamana ma eere tiya iini. Ka'dingnge ana ko'do ka tinggini ma gasasa mo, kümme erempeera na Masala ka anangnga eene ka niisö no.

³ Küüwe tüüsü ma Müüsa tasaga ya Masala, nja tüüsü ma dhünggü kiki,
 “Ka Masala Uugaara ma ana türü mo,
 kadhabbu linggo nüüdü keefe,
 nafiini nüüdü ka dhidho ka dhorro,
 Uugaara ma nagürüünü nye'd'de.

⁴ Ka Uugaara, mada i'i yungngo taalo ara tari'ba o'o, afünügü eere yüüdü ko'do?
 O'o na insili ungodho o'o.

Ara kadu nye'd'de sa köö'dö küürü küdü kidha kudumma linggo üüdü a dhidho, a kadu tadinö kide nye'd'de.”

⁵ Nikiri a'a ka tassa co nasala la ma Masala nja fangga ma tumma ma Masala ka tatanfa'da ka 'dotombo'do.

⁶ A kadhangga tö'dö kürö ndama la ma Masala ka iidümmü kafünü eera, maara ma iidümmü mafünü eera mungngo eene, kümme en'di ya

insili ya alimaana ya ka oona kimi'di naaro ana jönnö ma dahaba.

⁷ Könö ka eema tiya efe ka 'di ya egiisö ya tanangnga naadho ma dahaba ka iidümmü kafünü eera a kadhangga tanno iidümmü kafünü eera no kadigine a tagoroo'bo ma Masala, tammo efe ka 'di turi ta'billi mo.

⁸ La ma Masala tadigine ana ndhiigö ma tidhindhi nja türü tanno Masala, taalo ömö'di ma tambaanya co la ma Masala, ara maara ma iidümmü mafünü eera ma kadhangga tanno iidümmü kafünü eera no köö'dö iini no ka titaalo.

16

Naadho ma tagoroo'bo na Masala

¹ Naföönyö a'a tumma ko'd'do ndama la ma Masala eemaga ka kadhangga tanno iidümmü kafünü eera no, “Aaga agolo aaga tuurugu naadho ma tagoroo'bo na Masala na iidümmü kafünü eera no ka 'büdhülü.”

² A tadhangga ya dhidha ya tunggeene ateeffe tuuru ker'de miini ka 'büdhülü, eema ya in'di ya tatoroko abbü 'dala ka kadu na ana kala ma niimö ma toroko nja kadu na üürü ka koronggore no kamma kini.

³ İkirı tadhangga ya eera ya ka tuuru ker'de miini co to, a 'biidi tafeene nja eriidö ma ömö'di tiya eyi ya, eema ya adinö ka to ya taaya nye'd'de.

⁴ A tadhangga ya iidoona ya tuuru ker'de miini co a neeri nja nduguli ma 'biidi atem'bele kada eriidö.

⁵ Nikiri a'a ka aföonyö a tadhangga ma 'biidi ka tiki,

“O'o taalo nüüni ada kadu ku'bu, o'o nadho ka fiini,

yungngo kide adaganna kide, o'o na insili no, kudumma üüdü nadho ka fiini,

⁶ kudumma eene ka tuuru eriidö ma kadu tanno Masala co nja nagane'bi,

yungngo üüdü ka anangnga eriidö eene a'da kooye,

kikiri kaluna yeene ka asaasa ya.”

⁷ Naföonyö a'a tumma afe'de ndama misi ma tirri iki,

“ii, Masala o'o na Uugaara ma ana türü mo, fiini yüüdü ka dhidho atatimin'da.”

⁸ A tadhangga ya egüisö ya tuuru ker'de miini ka ndanaaya a türü tananja eene ma tinyogo kadu ana issi.

⁹ A kadu tatinyogo a tagu'daana, keela eere ya Masala, mana türü ma maara, lakiini taalo kaadha ka tatoroko, kitaalo kafünügü Masala ko'do.

¹⁰ İkiri tadhangga ya iidümmü ya uuru ker'de miini ka kööyö tanno niimö ma toroko, a tauugaara niini talifi. İkiri kadu ka agi'di nagonggo'do neene kudumma eene ka tin'di.

¹¹ Keela Masala ma 'dotombo'do kudumma tin'di tanno eene nja 'dokotere tanno eene, kitaalo kaadha ka linggo tanno eene.

12 A tadhangga ya iidümmü kafünü unggodho ya tuurugu ker'de miini co ri ma Fūrat ya dhabbu ya, a 'biiḍi miini taa'du amang kini tindinaana fiini ma naguugaara ma fiini ma ndanaaya no.

13 Nikiri a'a ka tasala nagoronggore na nyoro no kiidoona kafeene nja namuro kunggunu kuro ndama niimo ma ni ma 'biiḍi ya dhabbu ya nja niimo ma niimo ma toroko nja niino ma ne'bi tiya akorokoro ya.

14 Eege ka nagoronggore ma na'bu na ale'bele eema keefe no, kaco ka naguugaara ma 'buhulu nye'd'de ka wagaana eege ka oona keema koro'bo ka uuru tanno dhabbu, uuru ma Masala tanno ana turo mo.

15 "Adino ko'do, ara a'a to'do afa tanyoro, a'diila nja omö'di tiya adino ko'do ya afa ka en'di amang kini tafa tunggeene ana oona ku'bu a kadu tiji i'i ka ta'dongngonyo ka oona."

16 Awagaana eege ka oona ka 'buugu tiya ana eere a tangga Ebriya a'da Harmajdun.

17 A tadhangga ya iidümmü kafünü eera ya tuurugu dho miini coo'do, a tumma to'do kuro ko'd'do ndama kooyo ka la ma Masala iki, "Ndafaradene."

18 Iki tomo'do ka limaana, fara ma abaana ma tomo'do, a 'buugu tatinggi'di dhindho taalo agüni adene nggege jiddi ma omö'di ka taganna 'buhulu.

19 Anya ma dhabbu mo tasuminunja ku'bu ma iidoona ka oona, a naanya ma kajeene tatangga'da a Masala tagigi Babil ma dhabbu mo

manangnga oogo ka tooye ngeeli ka ker'de tanno oono, ngeeli ma tagoroo'bo noono.

²⁰ A najasiira tarünö nye'd'de kungngo a na'dikinya tamanyaga.

²¹ A köröörö ya iifi ya, ta'dinggö ka kadu ko'do ndama 'dotombo'do adhabbu, a kadu teela Masala kudumma tabbü adene ma köröörö, kudumma tabbü adene miini ka tatoroko 'do.

17

Aka nja nümö ma toroko

¹ A tadhangga könö ana ka tanno na iidümmü kafünü eera no ana naadho ka iidümmü kafünü eera no iki a'a, “Aayu nalaga o'o ka tapusu adene tanno madatemelö tammo dhabbu mo memmi ka 'büidi ya dhabbu ya.

² Naguugaara ma 'büdhülü kafüngngö ana oogo, a kadu ma 'büdhülü taaya kene ka tagooye ngeeli ma temelö noono.”

³ İkirı tadhangga ka 'duga a'a a koronggore aco a lodho iini, nasala aka memmi ka 'dugeere ma nümö ma toroko öödhe ana nagereene ma teela Masala ka oona nye'd'de, nanggüüdü niini ka iidümmü kafünü eera ana iidö kada'baaga.

⁴ Madagümmü en'di ya dhöyö ya nja tiya öödhe, mümmü dahaba nja nüügisi tanno agu'daana no nja lüülü, dho ma dahaba mungngo oono ka nüsö madigine ana eema tiya toroko ya nja nyoro ma temelö tanno oono.

⁵ İkirinja eere oono ka dhugudha a'da, kume, “Babil ma dhabbu, nümö ma katemelö nja nyoro ka 'büdhülü.”

⁶ Nasala a'a aka ka teyi ka eriidö tiya oono ka tagooye ma kadu tanno insili no, nja kadu tanno agirinadene kudumma eene ka tamma ka Yasu no. Kede ka tasala oogo nadhere 'do.

⁷ İkirı tadhangga ka tindini a'a a'da, “Minna agu o'o nadhere? Ara a'a tadirina niimö ya afeene nja aka nja niimö ma toroko tiya ümmü oogo ka 'dugeere ya a nanggüüdü ka iidümmü kafünü eera ana iidö kada'baaga no.

⁸ Niimö ma toroko yüüdü ka tijöögö ya akeefe ka 'di, illi i'i anda taalo 'bitingngö, lakiini i'i anda kete köö'dö kürö ndama ööye ya dhonggoro ya ma co teyi. A kadu na ka 'büdülü no tadhere, nagereene tanno eene taalo kakirinja ka sorne ma tefe ka 'di jiddi ma 'büdülü ka tarü'bü adene kene kara tasala niimö ma toroko, kudumma iini ka takeefe ka 'di, a 'bitingngö taalo efe ka 'di, illi i'i ara tafada öö'dö.

⁹ “Kasaasa tumma no, tussu eema nja ta'dara, nanggüüdü na iidümmü kafünü eera no eege ka nakürünggürü na iidümmü kafünü eera, aka ka temmi kide no. Eege ka naguugaara na iidümmü kafünü eera afe'de.

¹⁰ Na iidümmü no ka'dinggö, aya iidümmü kafünü ungodho ya aleefe tauugaara, aya iidümmü kafünü eera ya ara üfürü tö'dö, lakiini tauugaara niini taalo ara tadhonggoro.

¹¹ Lakiini niimö ma toroko ya akeefe ka 'di, asa katitaalo efe ka 'di ya, i'i ya uugaara ya iidümmü afünü iidoona ya. I'i ya miini ama tanno iidümmü kafünü eera no, i'i ara co teyi.

¹² “İlli iidö na ada'baaga nüüdü kijöögö no eege ka naguugaara na ada'baaga küfürü tümümü

tauugaara no, kara sa ka'duga türü ma tauugaara nja niimö ma toroko ana ndanaaya ka unggodho.

¹³ Eege no, tumma neene ka unggodho meene ka anangnga türü neene nja tauugaara a niimö ma toroko.

¹⁴ Kara teema koro'bo nja dhünggü, lakiini dhünggü ara tii'bi eege kudumma iini ka ta Uugaara ma naguugaara, ada Uugaara ma naguugaara na iifi no, a kadu na aneene nja eene no eege kagümmünüdene, nja tanno akessedene no, nja tanno amma ka Masala no."

¹⁵ İkiri tadhangga ka tiki a'a, "'Biiidi yüüdü ka tijöögö aka tammo a temelö mo ka temmi kide ya, i'i ya kadu nja kajeene nja naanya nja tumma kadhoonyo.

¹⁶ İidö na ada'baaga nüüdü ka tijöögö no nja niimö ma toroko, kara saga diidi aka ma temelö mo kara tamuru eema ya kono nye'd'de kafa kono ana oona ku'bu, kagu uu'da noono kinyogo oogo ana issi.

¹⁷ Kudumma Masala oogo manangnga tumma no kene ka nanggeedi a'da kalinggo afa ma tiya oono ka asaasa ya kungngo, meene kimi'di tumma ma tümünü tauugaara neene a niimö ma toroko, amang ka tumma tanno Masala co ööye miini.

¹⁸ Aka müüdü ka tiji oogo mo, oogo ma anya tammo dhabbu mo, ma uugaara ma naguugaara ma 'büdhülü."

Ta'dinggö na Babil

¹ Nîkîrî a'a ka tasala tadhangga könö afe'de unggunu aku'bu ndama 'dotombo'do ana türü kadhabbu, a 'büdhülü ta'dara a töyeene tanno iini.

² Iidhe a tumma ko'd'do,
 “Ma'dinggö, ma'dinggö Babil ma dhabbu mo,
 ma ta'buugu ma na'bu kadanna kide
 ndama 'buugu ma taneene ma nagana'bu
 tanno oroko no
 nja uyi tiya nyoro ya, ya kadu kanu kide ya
 nye'd'de.

³ Kadu ma 'büdhülü nye'd'de tagooye ngeeli na itoto na ma temelö tanno oono,
 a naguugaara ma 'büdhülü kafüngngö ana oogo,
 a kadu ma na anadene ana eema tüüsü ka eema tiya oono ya dhabbu ya.”

⁴ Nîkîrî a'a ka föönyö tumma afe'de ndama 'dotombo'do kiki,
 “Akö'dö kürö ndama oono, kadu eede,
 amang kada tafa toso ka eema tiya toroko
 ya nja oono,
 amang kada tafa toso ka tapusu adene ka namaara nja oono.

⁵ Kudumma tatoroko tanno oono kakodhoncoko kalla kala 'dotombo'do,
 a Masala tagüügî tatoroko noono.

⁶ Agüünî midhi ku'bu ana oogo afa moonoo ka tagüünî midhi ku'bu 'do ana aaga kungngo,
 aaga kusu midhi kono kide ma dhabbu ada yoono ka tagüünî ana aaga ya kungngo.

Aaga konyaana ker'de ma ngeeli tanno oono
kafünü kide no.

7 Aaga apusu oogo, aaga tafa kono mafara
dhindho

tamana moonoo ka takidhindhī ma taküüsü.

Mindhigī eyi yoono miki,

'A'a nungngo nemmi kita ka tauugaara,

taalo a'a na aka ma küüme,

nitaalo nussu muuyu.'

8 Nggeege ara tagoroo'bo tümmü oogo ana uuru
ka ungodho,

inde nja müürü nja iire,

ara issi tinyogo oogo

kudumma türü kungngo Masala Uugaara,

mara tasigi oogo mo."

9 Ara naguugaara ma 'büdhülü sa fara
kamüürü, eege na füngngö ana oogo kadhodho
nja oono, kafara kene kara tasala ndhügö ma issi
tanno oono.

10 Köödhi ku'b'ba eene kari'ba a tapusu adene
tanno oono kiki, "Am'ba! Am'ba küdü anya ma
dhabbu, anya ma Babil ma ii'baana mo, ara o'o
tasigidene ana ndanaaya ka ungodho."

11 Ara kadu ma 'büdhülü na anadene ana eema
no, saga fara oogo kamüürü, kudumma ömö'di
ma tana eema kene taalo.

12 Eema ma dahaba nja fudda nja nduguri
nja lüülü tiya agu'daana ya, nja en'di ma hariir
nja en'di ma silik tiya öödhe ya, nja naafa
nye'd'de na afeene nja togoogo no, nja eema tiya
agalinggo adene ana igini ma mongngo ya nja
kee'di tanno agu'daana no, nja tanyaanya nja
eliili nja nduguri.

¹³ Nja girfa nja kondho ma ndhüigö nja russu, nja maaga nja felengidhi, nja ngeeli nja uu'ba nja müsö tammo ilollo mo nja migile, nja eema ma eriidö nja ki'biini nja naguttu nja karru nja kasaga nja nagoronggore ma nakömö'di.

¹⁴ A kadu na anadene no tiki oono, “Eema ya a'diila ya kanna küdü ya akungeene. Eema ya kanna küdü adhabbu ya nja tidhindhī a'dugadene taalo o'o taluna afe'de.”

¹⁵ Kadu nanadene ka anya kana almaala dhabbu no kara ta'dingnge ku'b'ba kanna kudumma eene ka ari'ba a tapusu adene tanno oono, katafara kamüürü.

¹⁶ Kiki,

“Am'ba! Am'ba küdü, anya ma dhabbu mo, magümmü en'di ma ndugaara na ku'daana no ka oona nja en'di tiya öödhe ya, ümmü dahaba nja kisi tanno agu'daana no nja lüülü.

¹⁷ Eema yoono ya nye'd'de kungngo ara titaalo ana ndanaaya ka unggodho.”

Namürkabü nye'd'de nja dhabbu ma nasawaaga miini nja kadu tanno no linggo kide no, nja kadu töccö no kuri ka to ka oona no töödhi ku'b'ba.

¹⁸ Kiidhe ko'd'do kene ka tasala ndhüigö moonoo ka finne, “Maganna anya ma idhindhī afa ma tammo kungngo?”

¹⁹ Kadhifi kuraaga eene ka nanggüüdü kafara kamüürü kiki a'da,

“Am'ba! Am'ba ka anya tammo idhindhī mo, a kadu na ana namürkabü ka to no eege

saga tatangga'da ana ndanaaya ka ungodho.

20 'Dotombo'do, adhodho kudumma oono ka taga'dadene,
aaga dhodho kadu na insili no nja kadafiini
nja nagane'bi

kudumma Masala ka takapusu oogo ka eema tiya
oono ka tagüüni ana aaga ya."

21 İkirı tadhangga ya dhabbu ya ana türü ya,
ka a'duga misi ma köje nja misi ma tawöönö ma
dhabbu mo, apügü co to iki,

"Nggeege ara Babil ma idhindhı mo tapügünja
co to a türü
mitaalo mara talunadene afe'de.

22 Taalo kadu kara taföönyö a kadu ka tüwe
tüüsü
nja fara ma perempeera nja kaaru nja
tiniidö

taalo kadu ma linggo kara tanna küdü kanna
afe'de,
taalo kadu kara taföönyö fara ma tawöönö
küdü afe'de.

23 Taalo töyeene ma lamba töyeene küdü afe'de,
taalo taföönyö tüüsü ma kadu tanno arna no
küdü,

kudumma kadu tanno anadene ka kadu ma
'büdihülü na idhindhı no,
a kadegeene nüüdü no kaama kadu ma
'büdihülü nye'd'de kunggo.

24 Kaduna eriidö kono ma nagane'bi nja kadu
tanno insili no
nja kadu na kirinadene ka 'büdihülü
nye'd'de."

19

Tüüsü ma tii'baana ka 'dotombo'do

¹ Ndama kanna nikiri a'a ka aföonyö tumma ko'd'do tumma ma kadu kadhabbu ka 'dotombo'do kiidhe kiki,

“Halülüya!

Toolona na Masala tammo aja nja türü nja tidhindhi.

² Tasigi noono kadho ka fiini kada timin'da. Agasigi madatemelö ma dhabbu mo maga'da 'büdhülü a temelö tanno oono, a'diinä kömüsü ma eriidö ma kasaga tanno oono.”

³ Kalneege ko'd'do afe'de,

“Halülüya!

Ndhüigö ma tafinne moono kisi coo'do turi ta'billi.”

⁴ İkiri kadıifi no ukumu ömö'di kafünü egüisö no nja eema ya efe ka 'di ya egüisö ya, tüürü ku'bu ana küüge küürü ka Masala tammo emmi ka kööyö mo. Kiki,

“Amin! Halülüya!”

⁵ A tumma tö'dö ndama kööyö kiki,

“Aaga fünügü Masala tammo aja,

aaga no kasaga tanno oono

nja kadu nye'd'de na iifi no nja tanno idhi-idhi no kari'ba oono.”

⁶ Naföonyö tumma kafeene nja tumma ma kadu kadhabbu afa fara ma faaya, afa fara ma tabaana ma tombo'do iki,

19:1 19.1 Tüüsü ma Nakaaru 106.1; Tüüsü ma Nakaaru 113.1–2

19:2 19.2 Tumma tanno Yasu 16.7; Tüüsü ma Nakaaru 19.9

19:4 19.4 Tüüsü ma Nakaaru 47.8; Asaiya 6.1

“Halülüya!

Kudumma Uugaara Masala maaja ma ana türü mo ara tümümü tauugaara.

⁷ Kada kadhodho angnga taga'deema, angnga takafünügü oogo ko'do

kudumma uuru ma tarna tanno dhünggü ka ndö'dö

a 'bala miini manda kindinaana oona ku'bu.

⁸ Kanangnga ten'di ma ndugaara ma'bassa ma insili mo oono,

a'da magirni kono ka oona.”

Kudumma ten'di ma ndugaara eege ka linggo ma kadu na Masala tanno a'diila no.

⁹ İkirı tadhangga ka tiki a'a, “Arigiri tumma no, a'diila nja kadu tanno tö'dö ka taanyara ma tarna ma dhünggü.” A tadhangga tiki a'a afe'de, “Tumma na Masala dhorro eege kungngo.”

¹⁰ Nüürü kini kidha ma tamma kini, lakiini i'i iki a'a, “Fa tüüni kungngo, a'a na tasaga afa o'o, afa nagöre nüüdü na ümmü tumma na Yasu no. Afara ka Masala kudumma tumma tanno Yasu eege ka korongore ma tane'bi.”

Ömö'di ya aka ka muttu tiya 'bassa ya

¹¹ Nıkirı a'a ka tasala 'dotombo'do kata tanfa'da, a muttu tö'dö a'bassa ana ömö'di ka taka kide ana eere a'da tadho ka fiini ya nja dhorro ya. Tasigi kadu kada dhidho ma timin'da, eema koro'bo taalo üüni ada kadu ku'bu.

19:6 19.6 Tö'dö kürö 15.18; Tüüsü ma Nakaaru 93.1 **19:7 19.7** Hawsha 2.19–20; Afosus 5.25–27, 32 **19:11 19.11** Tüüsü ma Nakaaru 96.13; Asaiya 11.3–5

12 İıye niini kafeene nja onngo'do ma İssi, a kalembö kungngo iini ka üüdü kadhabbu. Eere ikirinja kini taalo ömö'di ma tussu illi i'i.

13 Ten'di ma unngo iini ka oona manyo'donja ka eriüdö ana eere a'da tumma na Masala.

14 A nasigira ma 'dotombo'do ka taka ka naguttu kada 'bassa kuurna i'i keere, ana en'di ma ndugaara ya ka'bassa ya insili ya ka oona.

15 A kulu'ba ma dhonggoro mo ticci akürö ndama iini ka nīnō mana kuri, miini kara tabbü kadu ma kajeene iini, ara tauugaara meene a kuufi ma ndaliili. Asiri ka 'doonya tiya ki'bim'bi ma ngeeli ma tagoroo'bo nja Masala tammo ana türü mo.

16 Eere taga kirinja ka ten'di tammo iini nja tadüüfü tanno iini a'da: Uugaara ma naguugaara, ada Uugaara ma naguugaara na İifi no.

17 Nasala tadhangga ka a'dingnge ana ko'do ka ndanaaya, iidhe ka uyi ko'd'do ya alagala ka 'dotombo'do ka söödö ya, "Aaga ö'dö aaga emmi İn'dili ka taanyara tanno Masala na dhabbu no.

18 Aaga kö'dö aaga tagu uu'da ma naguugaara nja uu'da ma naguugaara ma nasigira nja uu'da ma tanno ana türü no, nja uu'da ma naguttu nja kadu tanno kaaka kide no, nja kadu nye'd'de, kasaga nja tanno taalo ka kasaga no, na idhiidhi no nja tanno İifi no."

19 Nasala nīmō ma toroko nja naguugaara ma 'büdhülü nja nasigira tanno eene kawaana oona ma teema koro'bo nja ömö'di tiya aka ka muttu ya nja nasigira tanno iini.

²⁰ A nīimō ma toroko tūmmū adene nja ne'bi tiya akorokoro ya, ya agalinggo eema keefe kidha ma nīimō ma toroko. Īisīnī kadu na ana kala ma nīimō ma toroko no, nja kadu tanno ūūrū ku'bu kamma ka koronggore ma nīimō ma toroko no. Kapūgū nīimō ma toroko nja ne'bi tiya korokoro ya co to ma albaru ma ĩssī tanno afinne no kadinō kungngo.

²¹ A tūreene meene tagirinadene a kulu'ba tammo icci a kūrō ndama nīinō ma ōmō'dī tiya aka ka muttu ya, uyi tūūsū ka uu'da tanno eene nye'd'de kungngo.

20

Ebliisi agapusu adene a nagūrūünū alif

¹ Nīkirī a'a ka tasala tadhangga ka tungguna aku'bu ndama 'dotombo'do ngafata ma ōōye ya dhonggoro ya ungnō iini ka nīisō ana jansiiri isissi.

² Ūmmū nī ma 'bīidī ya dhabbu ya nī ma 'billi ya, ya ana eere a'da Ebliisi nja Sitan, imi'dini i'i ku'bu a nagūrūünū na ō'dō alif.

³ Īkirī ka tapūgū i'i co ōōye tiya adhonggoro ya eere kide abbūnnū hitimi kide amang kini tafa tīisīnī kadu afe'de, ara nagūrūünū na ō'dō alif no ka tatīimō. Kassa ka tapa kini agūnū idhilli.

⁴ Nasala a'a nagōōyō a kadu tanno a'duga tauugaara ma tasigi kadu. Nasala nagoronggore ma kadu tanno na tendhe kene ka eyi no kudumma eene ka tema ma Yasu ka ūūdū ma tumma ma Masala. Taalo kūūrū ku'bu kamma ka nīimō ma toroko, kitaalo kamma ka koronggore tiya iini, kitaalo kana kala ma nīimō ma toroko ka

nadhugudha nja iisine. Kateefe ka 'di kada naguugaara nja Almasihi a nagürüünü kö'dö alif.

⁵ Lakiini türeene ma kadu taalo kara tefe ka 'di a'da üfürü nagürüünü na ö'dö alif tatüümö. Tafiki'dö na dhidha no eege kamiini.

⁶ A'diila insili nja kadu tanno ka tafiki'dö tanno dhidha no, taalo türü ma inde tanno eera no kene lakiini eege kara ta ka'boge ma Masala nja Almasihi, kada naguugaara nja iini a nagürüünü na ö'dö alif.

Ta'dinggö na Ebliisi

⁷ Aga nagürüünü na ö'dö alif no kara tatüümö ya kapa ka Sitan ndama pabuusu tiya iini.

⁸ Öö'dö kürö aga'da kadu ka nanggüüdü ka 'büdhlülü ka 'buugu na egüüsö no ma 'büdhlülü, kana eere a'da Jüj nja Majüj, awagaana eege ka oona ma tema koro'bo eege kaköje nja ndamugu ma to.

⁹ Kanyalaana oona ka 'büdhlülü kaku'du angga na kadu tanno insili no ko'do nja anya tammo oono ka asaasa oogo mo, lakiini issi ka öö'dö ku'bu ndama 'dotombo'do kagirina eege.

¹⁰ Kapügü Ebliisi ya ka'da eege ka nanggüüdü ya co to ma issi nja albaru ka 'buugu tiya nümö ma toroko nja ne'bi tiya korokoro ka tanna kide ya, kapusu adene kide eege nye'd'de uuru ana ooso turi ta'billi.

Kööyö ya dhabbu ya a'bassa ya

¹¹ Nikiri a'a ka tasala kööyö a'bassa adhabbu, nasala ömö'di ya emmi kide ya. 'Büdhlülü nja

'dotombo'do ka arünö kini kidha a ton'do meene titaalo.

¹² Nasala kadu na aaya na iifi no nja tanno dhi-idhi no ka'dingnge ana ko'do kidha ma kööyö, a kasorne tatanfa'da. Sorne könö tatanfa'da i'i yungngo sorne ma tefe ka 'dī. A kadu na aaya no kummü adene ka tamana linggo tanno eene afa ma sorne ka tiki kungngo.

¹³ A to tadhifigi kadu na kide na aaya no ko'do, a inde nja 'buugu ma inde tadhifigi kadu na aaya kide no ko'do, kagapusu adene nye'd'de ka üüdü ma linggo tanno eene.

¹⁴ Inde nja 'buugu ma inde kapügü co a to ma issi, a to mo, oogo ma inde tanno eera no.

¹⁵ Ömö'dī ya eere tiya iini ka titaalo ka sorne ma tefe ka 'dī ya apügünja co to ma issi.

21

'Dotombo'do no issi no nja 'büdhlü tiya issi ya

¹ Nikiri a'a ka tasala 'dotombo'do no issi no nja 'büdhlü tiya issi ya kudumma 'dotombo'do tanno dhidha no nja 'büdhlü tiya dhidha ya ka manyaga, a to titaalo afe'de.

² A'a na Yühanna nasala a'a anya ma insili mo, Örsaliim ma issi mo, ka tunggunu aku'bu ndama 'dotombo'do ndama Masala, afa 'bala ma indinaana oona ku'bu ka'diila ma toreene nja nyuri tiya oono.

20:11 20.11 Danial 7.9-10; Asaiya 51.6 **21:1 21.1** Asaiya 65.17;
 2 Bütürs 3.13 **21:2 21.2** Asaiya 52.1; Asaiya 61.10; Tumma tanno Yasu 3.12

³ Nikiri a'a ka aföonyö tumma ko'd'do ndama kööyö kiki, “A 'bitingngö 'buugu ya Masala ka tanna kide nja kadu ya, i'i yunggo mara tanna kide nja eene kada kadu tanno oono. Masala ana oona moonoo mara taneene nja eene, mada Masala tammo eene.

⁴ Mara tayu fara eene ka iyye, ara inde titaalo nja müürü, a fara titaalo nja tin'd'di, eema ya illi ya ara tamanyaga.”

⁵ A ömö'di ya emmi ka kööyö ya tiki, “Ara a'a tanangnga eema in'dili ka tissi.” Afada iki a'a, “Arigiri tumma no ku'bu ka dhorro ka tatimin'da.”

⁶ Iki a'a, “Afaradene eema nye'd'de. A'a na dhidha na tiya eere ya. Ömö'di ya tenege kagu i'i ya ara a'a tinyi 'biidi iini ndama, nduguli ma tefe ka 'di a'da taalo afaana.

⁷ Ömö'di ya ii'baana a'duga eema ya nye'd'de na ta Masala tammo iini a ta'bii'bala tiya eede.

⁸ Lakiini kadu nari'ba no nja tanno taalo kamma ka Masala no nja kadu tanno kirina kadu no nja kadu tanno oroko no nja katemelö nja kadegeene nja kadu tanno amma ka eema ma namasala no nja kadu tanno akorokoro no nye'd'de, 'buugu yeene a'da to ma finne ana issi nja albaru mo, inde na eera no eege kamiini.”

Örsaliim ma issi mo

⁹ A tadhangga könö ana ka tanno iidümmü kafünü eera no, na ana nadho ka iidümmü kafünü eera kadigine ana maara na iidümmü

kafünü eera no. Ö'dö iki a'a, "Aayu nala o'o ka 'bala aka ma dhünggü."

¹⁰ A'duga a'a a koronggore asirö anya ma dhonggoro ma dhabbu mo, alaga a'a co Örsaliim anya ma insili mo, munggunu ku'bu ndama Masala ka 'dotombo'do.

¹¹ Alimaana afa töyeene ma tïdhindhï ma Masala, ka liminanago afa misï ma ku'daana mo, kafeene nja misï ma öödhe ma agiiri mo ya insili afa gasasa ya kungngo.

¹² A ndhïidhö kadhabbu adhonggoro, nagïnyeene ka inggide kada'baaga kafünü eera, a kadhangga kinggide kada'baaga kafünü eera a nagereene kakirinja kide eege ka nagereene ma siliga ma Israyil na ö'dö kada'baaga kafünü eera no.

¹³ Ndama fiïni ma ndanaaya nagïnyeene kinggide kiidoona, ndama küüle nagïnyeene kinggide kiidoona, ndama küülü nagïnyeene kinggide kiidoona, ndama niimö ma ndanaaya nagïnyeene ka inggide kiidoona.

¹⁴ A ndhïidhö ta'dïngnge ka kadese kada'baaga kafünü eera, nagereene kungngo eene kana eere a'da nagereene ma kadafiïni tanno dhünggü na ada'baaga kafünü eera no.

¹⁵ A tadhangga ya ageema nja a'a ya, ümmü tam'bala ma dahaba ma tinni anya iini nja nagïnyeene miini nja ndhïidhö miini.

¹⁶ İkirï ka takinni oogo möö'dö alif na miïya ka iidümmü nameele (1,500) a tadhonggoro miini nja dhüdhü miini nja ta'doogo miini ka unggodho.

¹⁷ İkirï ka takinni ndhïidhö miini öö'dö

dhüdhü ma niisö ma ömö'di ukumu kadu ka iidümmü a kadu keera kafünü kide egüisö (144), afa tadhangga ka takineene kada köje afa niisö ma ömö'di.

¹⁸ A ndhüidhö tarü'bü adene a niigüsi na öödhe ka agiiri ya, ya, anya tarü'bü adene ana dahaba ungodho i'i kungngo kafeene afa gasasa ma insili mo.

¹⁹ A kadese ma ndhüidhö ma anya takesedene a niigüsi tanno agu'daana no kada tonggoonyo. Kadese na dhidha no kama niigüsi tanno a kirikiri na öödhe no.

Anno eera no, misü ma kirikiri ma lanja mo, anno iidoona no misü ma 'bassa mo, anno egüisö misü ma kirikiri mo.

²⁰ Na iidümmü ya misü ma irrüfi mo, aya iidümmü afünü ungodho ya misü ma dhöyö mo, aya iidümmü afünü eera ya misü ma kuuli ma kirikiri, aya iidümmü afünü iidoona ya misü ma kirikiri mo, aya iidümmü afünü egüisö ya misü ma kuuli mo, aya ada'baaga misü ma kirikiri mo, aya ada'baaga afünü ungodho ya, misü ma ngalangala mo, aya ada'baaga afünü eera ya ünggüülü miini atonggoonyo.

²¹ Inye no tagalinggo adene ana lüülü ungodho, a fiini ma anya ya adhüföölö ya agalinggo adene ana dahaba tiya insili ya kafeene nja gasaasa tammo aja kiji 'buugu iini no.

22 Taalo a'a nasala la ma Masala ka anya, kudumma Masala Uugaara ma ana türü mo nja dhünggü eege ka la ma Masala.

23 Anya taalo masaasa töyeene ma ndanaaya nja tere, kudumma töyeene ma Masala ka töyeene ada kono, a dhünggü i'i ya lamba tammo oono.

24 Ara kadu nye'd'de saga tunggeene ka töyeene tanno oono a naguugaara ma 'büdhlü töö'dö ana almaala tiya eene oono.

25 Taalo naginyeene noono ka teere uuru na in'dilü no, kudumma ooso ka titaalo kide.

26 Tïdhïndhï nja ta'diila ma naanya kara tö'dö iini kide.

27 Taalo niimö ya nyoro ya ara co anya nja kadu tanno üünï eema ya toroko ya nja tanno akorokoro no, illi kadu no nagereene tanno eene ka kirinja ka sorne ma tefe ka 'di ma dhünggü.

22

Ri ma tefe ka 'di

1 İkirï tadhangga ka laga a'a co ri ma 'biidï ma tefe ka 'di, insili afa gasasa nduguli kiisö ndama kööyö ma Masala nja dhünggü.

2 İisö ka söödö ma fiinï anya, fa ma tefe ka 'di unngo ka tinggini ma ri ateera miini, eene laala ada'baaga kafünü eera ta ungodho ka tere. A dhaaru miini toolona kadu ma 'büdhlü ka maara.

³ Taalo teeladene kara tanna kide ndama uuru tanno afe'de, ara kööyö ya Masala nja dhünggü tanna ka anya, a kadu niini talinggo ada iini.

⁴ Kara tadinö ka dhugudha tiya iini, eere yiini tanna kene ka nadhugudha.

⁵ Taalo 'buugu ara tooso kide, taalo kara tasaasa töyeene ma lamba nja töyeene ma ndanaaya, kudumma Masala Uugaara mara tanangnga töyeene eene kara ta naguugaara turi ta'billi.

⁶ A tadhangga tiki a'a, "Tumma ka timin'da ka tadhorro. Masala Uugaara ma koronggore tiya nagane'bi mo, magürünü tadhangga yoono öö'dö tala eema ya ara tüünidene kete kungngo ya a kasaga tanno oono."

Tö'dö na Yasu

⁷ "Aaga föönyö, a'a nungngo nara tö'dö areere a'diila nja ömö'di tiya talinggo a tumma ma tane'bi ka sorne tiya."

⁸ A'a na Yühanna, naföönyö a'a nadinö ka eema tiya, kede ka taföönyö natadinö kide ya, na'dinggö ka uune ma tadhangga tiya anangnga a'a ka tadinö kide ya.

⁹ İkirı ka tiki a'a, "Fa tüünı kungngo, a'a nadasaga afa ma o'o nja nagöre tanno üüdü nagane'bi nja kadu tanno alinggo a tumma ma sorne nye'd'de no, afara ka Masala."

¹⁰ İkirı ka tiki a'a, "Fa taküdhü tumma ma tane'bi no ka sorne tiya no, kudumma uuru ka ndakete.

¹¹ Ömö'di ya üüni ada kadu ku'bu ya, fa kini ütü ka tüüni tatoroko, ömö'di ya nyoro ka eedi ya fa kini ütü ka nyoro tanno iini, ömö'di ya a'diila ya fa kini ütü kada ka ta'diila tanno iini, ömö'di ya insili ya fa kini ütü ka tinsili tanno iini."

¹² "Aaga föönyö, a'a nungngo nara tö'dö areere, talingnge ungnge eede ma eede kara tanangnga ömö'di ka taköje nja linggo tanno iini ka tagalinggo ya.

¹³ A'a na dhidha na ta eere.

¹⁴ "A'diila nja kadu no kagunu en'di yeene amang kene taduna fiini ma fa ma tefe ka 'di, eege kama co anya ndama nakinyeene ma ondo miini.

¹⁵ Lakiini kadu no kürö no, eege ka tiini nja kadegeene nja katemelö nja kadu tanno agirina kadu no, nja kadu tanno amma ka eema ma namasala no nja kadu tanno akorokoro kasaasa korokoro no nye'd'de.

¹⁶ "A'a na Yasu nagürünü a'a tadhangga yeede a'da öö'dö tadünügü eema ya co a nakaniisa, a'a na 'bereere ma 'bandaada ma Dawud, a'a na ndalfoore ma taka na öyeene no."

¹⁷ Koronggore nja 'bala kiki, "Aayu!" Ömö'di ya aföönyö ya fa kini iki a'da, "Aayu!" Ömö'di ya tenege kagu i'i ya, fa kini öö'dö, ömö'di ya asaasa ya, fa kini a'duga 'biidi ma tefe ka 'di a'da taalo faana kide.

¹⁸ Nanangnga a'a tumma ku'bu, ömö'di ya aföönyö tumma ma tane'bi no ka sorne tiya,

afa tagusu nīimō öccö kide, a Masala tagusu tagoroo'bo na kirinja ka sorne tiya no.

¹⁹ Ömō'dī ya agona ka 'bandumma ma tane'bi keere ka sorne tiya, ara Masala takoko faka miini ka fa ma tefe ka 'dī nja anya tammo insili mo, na keemadene ka sorne tiya no.

²⁰ Ömō'dī ya adinī ka eema tiya iki, “İi, ara a'a tö'dö areere.”

Amiin, aayu Uugaara Yasu.

²¹ Fa ka türü tanno Uugaara Yasu ka aneene nja aaga nye'd'de kungngo.

Katcha

Katcha-Kadugli-Miri: Katcha (Old Testament)

copyright © 2020 Wycliffe Bible Translators, Inc.

Language: (Katcha-Kadugli-Miri)

Contributor: ECS Diocese of Khartoum Translation Department

All rights reserved.

2020-11-18

PDF generated using Haiola and XeLaTeX on 18 Apr 2025 from source
files dated 29 Jan 2022

bc98a4a0-1c85-5c7a-932a-7dcefd213f80